




佛說寶雲經

梁扶南三藏曼陀羅仙共僧伽婆羅譯



清刻龍藏佛說法變相圖

佛說寶雲經卷第一

身一

梁扶南三藏曼陀羅仙共僧伽婆羅譯

如是我聞一時佛在伽耶山頂與大比丘僧
七萬人俱所作已辦捨諸重擔其心自在盡
諸有結正見解脫皆如大龍善解法界是法
王子能捨利養善具出家善具受戒意所欲
受者悉得滿足住涅槃道唯除阿難在於學
地諸大菩薩八萬四千人俱皆是一生補處
向一切智無有退轉志求佛地近於彼岸得
阿僧祇諸陀羅尼速得諸禪首楞嚴三昧遊
戲神通大慈大悲遍滿十方乃至無量無邊
佛土行空境界除諸蓋障盡三毒根善遊無
相室宅恒欲救濟一切衆生善知諸佛世界
得無礙智心如虛空深廣如海猶如須彌八
風不動心如蓮華不著塵水意如真實內外

明徹如淨真金中無瑕穢其名曰寶光菩薩
寶掌菩薩寶印手菩薩寶天冠菩薩寶髻菩
薩寶積菩薩寶藏菩薩寶山頂菩薩寶幢菩
薩金剛胎菩薩金胎菩薩寶胎菩薩功德胎
菩薩淨無垢胎菩薩如來胎菩薩智胎菩薩
日胎菩薩三昧胎菩薩蓮華胎菩薩解脫月
菩薩普月菩薩觀世音菩薩普賢菩薩普眼
菩薩蓮華眼菩薩大眼菩薩普威儀菩薩普
端嚴菩薩普行菩薩智定意菩薩法意菩薩
勝意菩薩增長意菩薩金剛意菩薩師子神
通菩薩大音聲王菩薩師子吼意菩薩深音
聲菩薩無染汙菩薩離一切垢菩薩月光菩
薩日光菩薩智光菩薩智功德菩薩月功德
菩薩蓮華功德菩薩寶功德菩薩文殊師利
菩薩跋陀婆羅等十六賢士賢劫千菩薩摩

訶薩等彌勒最爲上首四天王諸天等四天
王最爲上首忉利諸天等帝釋最爲上首
摩天餓摩天王最爲上首兜率陀天兜率陀
天王最爲上首化樂諸天化樂天王最爲上
首他化自在諸天他化自在天王最爲上首
善黨諸天薩陀^{身一}最爲上首一切諸梵天梵天
王最爲上首首陀會諸天摩醯首羅最爲上
首毗摩質多羅阿脩羅王婆稚阿脩羅王羅
睺羅阿脩羅王等無量百千億阿脩羅王阿
那婆達多羅王摩那斯龍王安伽羅龍王難
陀龍王和脩吉龍王德叉迦龍王如是等百
千億諸龍及諸龍子諸龍婢女如是等百千
萬億衆天龍夜叉乾闥婆阿脩羅迦樓羅緊
那羅摩睺羅伽人非人等百千億衆皆來集
會爾時伽耶山頂方四由旬微塵針鋒虛空

及地大衆充滿悉敷師子座莊嚴光顯高一
由旬嚴飾第一廣半由旬八千天衣遍布其
上地悉平正變爲金剛懸諸繒幡香汁灑地
無量天華遍滿在中其座左右生諸蓮華大
如車輪百千萬葉具金爲莖皆以紺瑠璃爲

臺因陀尼爲鬚香潔適意觸時快樂如是妙
華以供養佛彼師子座於其四角各生寶樹
高十五里其樹蔭蓋及半由旬如是莊嚴師
子之座佛坐其上心意清淨善轉法輪降伏
魔怨不爲八法之所染汙得無所畏智辯無

身一

三

滯心無怯弱猶如師子意行清淨如明淵池
深廣如海能出衆寶猶如須彌處於大海如
日盛明照於一切如月盛滿悉令清淨雨大
法雨如彼龍王處衆高顯如大梵天無量弟
子悉皆調順無量釋梵四天王等瞻仰觀佛

心無高下能令大衆溫光如日衆寶莊嚴爾
時世尊身色熙怡如日溫照一切大衆如寶
莊嚴頂顯放光名曰周遍普照百千世界無
量諸光以爲眷屬俱照十方繞佛三匝光從
口入而口無異相譬如淨月明照虛空然於
虛空亦無異相光從口入亦復如是譬如沙
聚酥油注中不見增損佛光入口亦復如是
爾時東方過無量恒河沙世界有國名蓮華
自在彼世界有佛名蓮華眼如來應供正遍
知明行足善逝世間解無上士調御丈夫天
人師佛世尊爲諸菩薩說一乘法彼國無有
聲聞辟支佛名時諸衆生皆得阿鞞跋致趣
向阿耨多羅三藐三菩提此諸衆生無有墮
食唯有法喜禪悅等食彼國雖有日月星辰
不以爲名唯有佛光照於彼土無有山林株

杌荆棘平地如掌彼有菩薩摩訶薩名除一切蓋障聞其名者一切罪障皆悉除滅時除蓋障菩薩摩訶薩蒙光觸身即詣蓮華眼佛所頭面著地爲佛作禮却住一面坐蓮華上復有無量菩薩亦蒙光明往詣佛所頭面著地頂禮佛足却坐一面除蓋障菩薩從座而起整其衣服偏袒右肩右膝著地合掌向佛而白佛言世尊以何因緣有斯光明遇斯光者心意快樂如是之光從何而來蓮華眼佛答言善男子西方有世界名娑婆佛號曰釋迦牟尼如來應供正遍知明行足善逝世間解無上士調御丈夫天人師佛世尊聞彼佛名皆得阿鞞跋致如是之光彼佛所放除蓋障菩薩復白佛言世尊以何因緣聞彼佛名皆得阿鞞跋致趣向阿耨多羅三藐三菩提

蓮華眼佛復告除蓋障菩薩言彼佛行菩薩道時發大誓願若我成佛聞其名者皆發阿耨多羅三藐三菩提心得阿鞞跋致除蓋障菩薩復白佛言世尊若聞彼佛名皆發阿耨多羅三藐三菩提心得阿鞞跋致者彼國衆生皆已得不蓮華眼佛答言善男子不得除蓋障菩薩復白佛言世尊彼國衆生可不聞耶蓮華眼佛答言善男子亦得聞名除蓋障菩薩白佛言世尊如其聞者云何不得蓮華眼佛答言善男子彼國衆生悉是阿鞞跋致亦非阿鞞跋致除蓋障菩薩白佛言世尊云何悉是阿鞞跋致亦非阿鞞跋致蓮華眼佛答言善男子聞彼佛名者雖得阿鞞跋致種子因緣不具行未滿足不得授記善男子我今爲汝說喻譬如種樹有其種子離於腐敗

具足生芽因緣當言爲生爲不生耶除蓋障菩薩白佛言世尊是名爲生蓮華眼佛答言善男子聞佛名者得其種子具足因緣便得授記除蓋障菩薩摩訶薩白佛言世尊我欲往娑婆世界禮拜恭敬釋迦牟尼佛蓮華眼佛即便答言善男子今正是時可往禮拜彼諸菩薩白佛言世尊我等亦當隨從除蓋障菩薩往詣娑婆世界禮拜恭敬尊重讚歎蓮華眼佛告諸菩薩言今正是時可往詣彼莫生下劣放逸之心何以故佛界衆生多諸貪欲瞋恚愚癡不肯恭敬沙門婆羅門好作非法心意羸弊惡口罵詈狠戾難調慳貪嫉妬懈怠懶惰放逸破戒無量煩惱之所纏縛於是惡衆生中而爲說法爾時諸菩薩白佛言世尊釋迦牟尼佛甚爲希有能於彼惡世界

衆生中而爲說法蓮華眼佛答言善男子彼佛世尊實爲希有如汝所言常處惡衆生中而爲說法彼惡世界能起一念善心者此亦難有何以故清淨世界衆生守信修善不難惡世界中於彈指頃發生信心歸依佛法僧於彈指頃能修持戒於彈指頃生離欲心於彈指頃生於慈悲發阿耨多羅三藐三菩提心此則甚難諸菩薩白佛言希有世尊希有善逝爾時諸菩薩除蓋障菩薩摩訶薩最爲上首爾時除蓋障菩薩摩訶薩并諸菩薩受佛教已歡喜踊躍頂禮佛足各還本座此諸菩薩有齋寶樹華果具足有齋瑠璃樹者有齋玻瓈樹者有齋金樹者有齋衆寶樹者有齋華樹者有齋果樹者有齋寶衣雲者有齋環釧瓔珞者有齋香雲者有齋華髮雲者有

齋寶蓋雲者有齋寶幢幡雲者有齋音樂雲者悉皆來集除蓋障菩薩摩訶薩所共詣娑婆世界除蓋障菩薩摩訶薩告衆菩薩言彼娑婆世界衆生多受苦惱汝等各各現神通力令彼衆生速得快樂時諸菩薩皆言唯然爾時除蓋障菩薩摩訶薩以神通力身出光明清淨無垢遍照娑婆三千大千世界此光能照地獄餓鬼畜生閻羅王趣諸苦惱者蒙光觸身身受快樂貪欲瞋恚悉令除滅慈心相向猶如父母三千大千世界諸閻冥處日月諸光所不及處以菩薩光故皆得相見三千大千世界鐵圍山大鐵圍山目真隣陀山摩訶目真隣陀山及諸餘山幽冥之處悉蒙光照上及梵天下至阿鼻地獄如是中間光明普照又諸菩薩皆放身光蒙其光者飢者

得食渴者得飲僂者得衣貧者得財盲者能視聾者能聽瘧者能言瞽者能行狂者得正苦者得樂諸懷孕者令得隱產當爾之時衆苦悉除共諸菩薩俱時而到伽耶山頂寶網彌覆三千大千世界於虛空中蓮華雲雨蓮華妙果雲雨妙果華鬘雲雨華鬘香雲雨香白氎雲雨白氎末香雲雨末香衣服雲雨衣服寶蓋雲雨寶蓋寶幢雲雨寶幢寶幡雲雨寶幡如是衆雲隨種而雨雨觸身時柔軟快樂爾時伽耶山坑坎堆阜自然平坦諸山樹木變爲寶林亦作梅檀沉水及諸香樹周遍嚴飾百千天樂於虛空中不鼓自鳴諸樂音中俱出偈頌

生於林毗羅 不由結業有 挺特無有比
我今禮於彼 心平如虛空 至於伽耶山

我今歸最妙 無上勝菩提 坐於道樹下
始悟於正覺 指地以爲證 魔怨皆退散
我今到伽耶 稽首無垢尊 世間皆幻化
衆相華開敷 八十好爲果 世間得依怙
我今從彼來 稽首於寶樹 具無量枝葉
我等悉供養

爾時尊者目連從座而起長跪合掌偏袒右
肩白佛言世尊我今不見其形而聞衆妙偈
頌佛告目連東方過此無量恒河沙佛土蓮
華世界有佛名爲蓮華眼今現在彼爲大衆
說法彼有菩薩摩訶薩名除蓋障復有無量
百千億菩薩皆來至此娑婆世界爲欲禮拜
恭敬於我至心聽法故彼諸菩薩造此偈頌
佛語已訖彼諸菩薩即到佛前除蓋障菩薩
摩訶薩最爲上首皆共頭面頂禮佛足却住

一面合掌向佛以偈讚曰
歸命大名稱 具足智慧者 歸命大精進
最勝牟尼尊 能拔於三有 超度煩惱岸
神光照世間 歸命無等尊 四方蒙光照
周遍悉解脫 歸命無等稱 不動如山王
深廣如大海 智慧無有量 一切諸外道
無能擾亂者 我今稽首禮 歸命於法王
第一寂滅道 無生亦無滅 體相如涅槃
歸依說法王 能轉法輪者 顯現於正道
安住於真諦 開演於涅槃 而授菩提記
善知於法相 及以煩惱性 如說而修行
觀察於律儀 貪欲諸瞋恚 無量心垢穢
一切諸塵障 於菩提樹下 智火悉燒盡
濟度於衆生 自度亦度彼 生死曠野中
勉濟諸衆生 長寢於重昏 三有之獄縛

勸令早覺悟 趣向歸依處 當爲作親友
究竟不放逸 隨從而來者 皆住於菩提
爲欲聽正法 願時而解說
爾時除蓋障菩薩摩訶薩偈讚佛已佛告諸
菩薩各還本座除蓋障菩薩摩訶薩及諸菩
薩皆坐蓮華臺上除蓋障菩薩摩訶薩從座
而起整其衣服偏袒右肩右膝著地合掌向
佛而白佛言世尊欲有所問唯願聽許佛即
答言若有疑者隨汝所問我當爲汝分別解
說除蓋障菩薩白佛言世尊云何菩薩具足
於施具足於戒具足於忍具足精進具足禪
定具足智慧具足方便具足於願具足於力
具足於智云何菩薩與地等云何菩薩與水
等云何菩薩與火等云何菩薩與虛空等云
何菩薩如月云何菩薩如日云何菩薩如師

子云何菩薩爲善調云何菩薩爲善御云何
菩薩如蓮華云何菩薩得大意云何菩薩得
淨意云何菩薩得無疑網心云何菩薩甚深
如大海云何菩薩得微細智云何菩薩得隨
順辯云何菩薩得無盡辯云何菩薩得淨辯
云何菩薩能令衆生得少欲知足云何菩薩
得隨應辯云何菩薩作法師云何菩薩得隨
順法云何菩薩得善解法界云何菩薩行空
境界云何菩薩行無相境界云何菩薩行無
願境界云何菩薩行慈云何菩薩行悲云何
菩薩行喜云何菩薩行捨云何菩薩得遊戲
神通云何菩薩得離八難處云何菩薩得不
忘菩提心云何菩薩得宿命智云何菩薩得
不離善知識云何菩薩得離惡知識云何菩
薩得佛清淨身云何菩薩得金剛身云何菩

薩得大商主云何菩薩得善知諸道云何菩薩得示不顛倒道云何菩薩常得定心云何菩薩得糞掃衣云何菩薩得三衣云何菩薩得旃衣云何菩薩得乞食法云何菩薩得一坐食法云何菩薩得一受食法云何菩薩得非食後食云何菩薩得阿練若行云何菩薩得樹下坐云何菩薩得露地坐云何菩薩在塚間行云何菩薩常坐不卧云何菩薩能隨敷坐云何菩薩善知教授禪法云何菩薩能持修多羅云何菩薩能持律藏云何菩薩能持威儀云何菩薩善知可行處云何菩薩善知修行法云何菩薩除於貪嫉云何菩薩於一切衆生能起等心云何菩薩善知供養如來云何菩薩除於憍慢云何菩薩善得信敬心云何菩薩善解第一義諦云何菩薩善知

十二因緣云何菩薩善知已體相云何菩薩善知世間相云何菩薩生淨佛國土云何菩薩處胎不汙云何菩薩捨家出家云何菩薩得清淨命云何菩薩心不愁惱云何菩薩善隨佛教云何菩薩常和顏語捨離頻蹙云何菩薩具足多聞云何菩薩善持正法云何菩薩作法王子云何菩薩爲四足王帝釋梵天之所供養云何菩薩知他體相云何菩薩善知成熟衆生云何菩薩善修和柔行云何菩薩共住安樂云何菩薩善修四攝法云何菩薩得威儀端正云何菩薩善爲衆生作依憑處云何菩薩喻如藥樹云何菩薩常修諸善云何菩薩善作變化云何菩薩摩訶薩速成阿耨多羅三藐三菩提佛告除蓋障菩薩摩訶薩善哉善哉善男子汝爲利益天人拔濟

一切衆生故發是問我今當爲汝說除蓋障菩薩摩訶薩白佛言善哉世尊願時演說佛即告言善男子我今當說汝等諦聽菩薩成就十法能具足檀何等爲十法施具足無畏施具足財施具足不望報施具足憐愍施具足不輕心施具足尊重施具足恭敬承事施具足不求有施具足清淨施具足善男子云何名菩薩法施具足無希望心自受持法爲人演說不求利養不爲名譽爲除一切衆生過惡不爲於利心無高下平等說法若爲王若王等若旃陀羅等說法等無差別不以此施貢高憍慢若能如是是名菩薩法施具足云何名菩薩無畏施具足菩薩自離刀杖亦教人離刀杖於一切衆生生父母想男女想親友想何以故佛說一切衆生從無始劫來

無非父母男女菩薩常於微細中捨身而與況復餘大衆生是名菩薩無畏施具足云何名菩薩財施具足菩薩見衆生多作諸惡便積聚財寶而施與之令離惡業安置善處又聞佛世尊作如是說檀是菩薩能除慳貪嫉妬之垢如佛所說習行於施不以施故而心自高是名菩薩財施具足云何名菩薩不望報施具足不爲得眷屬故施不爲得親友故施不爲欲故施菩薩作是念施菩薩淨戒是常行法以是因緣故是名菩薩不望報施具足云何名菩薩成就憐愍施具足菩薩見衆生飢渴受苦像形弊衣無所依怙無歸無趣無居止處離於福業便生殷重憐愍之心我今爲苦衆生發阿耨多羅三藐三菩提心但以衆生輪轉受苦像形弊衣無所依怙無歸

無趣飢寒困苦我當何時爲是衆生作衣服飲食乃至歸依舍宅現有財物悉施與之雖作是施而不生念存有我人財物等想如是施者是名菩薩憐愍施具足云何名菩薩不輕心施具足不分別施等大悲施不輕心施不吝惜施不瞋忿施不憍逸施不爲得名稱施不爲我能多聞故施如是之施名爲專心施尊重施恭勸施自手施如此等施是名菩薩不輕心施具足云何名菩薩尊重施具足若同梵行可尊事者若和尚阿闍黎等如是之人深生殷重起迎合掌瞻仰恭敬若有所作躬代營佐如是施者是名菩薩尊重施具足云何名菩薩恭敬施具足供養佛供養法供養僧香華妓樂遶如來塔塗掃佛地若諸塔廟朽故崩落修復嚴飾如是名爲恭敬佛

恭敬法者聽法讀誦受持書寫解說思惟其義如法修行不顛倒取義是名恭敬法恭敬僧者衣服飲食卧具湯藥種種雜物供給所須奉施於僧乃至貧下無所有時當用淨水敬心持施如此施者名恭敬僧施若能如是供養三寶是名菩薩恭敬施具足云何名菩薩不求有施具足菩薩施時不生是念我當生天亦不生念我當爲王及諸輔相大臣官屬是名菩薩不求有施具足云何名菩薩清淨施具足菩薩諦觀此施無垢無穢無雜如是施者是名菩薩清淨施具足善男子具此十事是名菩薩具足於檀善男子菩薩復有十法名成就淨戒何等爲十善學波羅提木叉戒善持菩薩緻密戒滅諸煩惱除不善覺怖畏惡業於小罪中尚生驚怖心常恐畏受

持頭陀法堅固不闕持戒不爲求有造業淨
三業戒云何名菩薩善學波羅提木又戒菩
薩於戒律諸經是佛所制皆專心受持不爲
種族故持戒不爲我見故持戒不爲攝徒衆
故持戒不見他瑕缺而輕毀戒是名菩薩善
持波羅提木又戒云何名菩薩善持綴密戒
菩薩作是念非但波羅提木又戒能使我成
阿耨多羅三藐三菩提諸餘菩薩威儀戒行
我亦當學如法修行云何是菩薩戒菩薩不
應行處終不往來非時不語善知時節善知
方俗順適人心不令衆生起於譏嫌善護衆
生令至菩提亦自具足菩薩威儀言辭柔軟
少於言說不好親近大臣群官恒修阿練若
行和顏悅色能具如是菩薩威儀戒及餘經
中諸菩薩戒悉具修行是名菩薩密綴戒云

何名菩薩滅一切結使皆悉焦然貪欲瞋恚
愚癡及餘纏障一切衆具亦皆焦然於貪欲
處生對治法能起欲處悉皆除斷云何是貪
欲處於美色邊能起欲因緣云何名不淨想
如觀已身髮毛爪齒皮膚血肉筋脉骨髓汗
淚涕唾肪膏腦膜咽喉心膽肝肺脾腎腸胃
百葉生藏熟藏屎尿膿汁菩薩常觀三十六
物若能如是不生貪心若愚癡嬰兒顛狂心
亂見是三十六物猶不起欲想況復智者諸
菩薩等常觀不淨云何當復起於欲想菩薩
摩訶薩見所愛色適意之時便生染心初見
色時即自念言如佛所說色如夢響無有實
事云何智者妄於夢中而生欲想是故菩薩
能生欲處悉皆遠離云何菩薩於可瞋中生
對治法而能離瞋及瞋因緣菩薩於諸衆生

常生慈心以是因緣便得除瞋若有惱害因緣瞋恚起時當深繫念對治之法是名菩薩除瞋方便云何菩薩除癡方便當念癡心不識善惡常守愚闇後受苦果無智自蔽惱他緣少不如貪瞋多有怨害如是觀時則滅癡

心是名菩薩焦然煩惱云何名菩薩除不善覺住於空靜阿練若處作如是念我今遠離於憤鬧處在閑靜地履行佛教諸餘沙門婆羅門親近憤鬧多有擾亂遠離佛教是名菩薩除不善覺云何名菩薩怖畏惡業觀察選

身一

十五

擇曾聞佛說專心修福堅淨持戒善學智慧以是因故最爲勝報具福德業遠離諸惡是名菩薩怖畏惡業云何名菩薩畏於微惡於小罪邊常生大畏心終不輕微小之惡以是因緣曾聞佛說少毒殺人況復多毒微細惡

中尚能將人至三惡道況復多惡而心不畏是名菩薩畏微小惡云何名菩薩心常恐懼爲人體信婆羅門刹利居士等以體信故即寄金銀種種珍寶信心用付不立時證菩薩終不生於隱匿之心若佛物法物僧祇物四方僧物菩薩寧當自食已肉終不侵他若飲若食供身之具不敢輒毀是名菩薩心常恐懼云何名菩薩受持頭陀法堅固不闕若魔眷屬及諸天等以妙色財欲來擾逼菩薩菩薩即時志固不動於心不毀是名菩薩受持頭陀法堅固不闕云何名菩薩持戒不爲求有造業菩薩持戒不求世間果報但爲滿足一切善法得無上道是名菩薩持戒不爲求有造業云何名菩薩淨於三業云何修淨身業離殺盜淫以是義故名爲淨身業云何淨

於口業離惡口妄言兩舌綺語是故名爲淨
於口業云何淨於意業除貪瞋癡邪見是名
淨於意業是名爲菩薩淨於三業善男子具
此十事是名菩薩成就淨戒

音釋

[illegible]

脾頻彌切土藏也胃干貴切百葉葉與嬰
腎時忍切水藏也憤古對切心亂也
於盈切人憤開關奴敦切不靜也
始生曰嬰

佛說寶雲經卷第二

身二

梁扶南三藏曼陀羅仙共僧伽婆羅譯

善男子菩薩摩訶薩復有十法能淨於忍何等爲十內忍外忍法忍隨佛教忍無方所忍修處處忍非所爲忍不逼惱忍悲心忍誓願

身二

忍云何名菩薩內忍菩薩飢渴寒熱憂悲疼痛身心楚切能自忍受不爲苦惱是名菩薩內忍云何名菩薩外忍菩薩從他聞惡言罵詈毀辱誹謗或毀辱父母兄弟姊妹眷屬和尚阿闍黎師徒同學或聞毀佛法僧有如是種種毀訾菩薩忍辱不生瞋恚是名菩薩外忍云何名菩薩法忍佛於諸經說微妙義諸法寂靜諸法寂滅如涅槃相不驚不怖菩薩作是念言我若不解是經不知是法終不得阿耨多羅三藐三菩提是故菩薩勤求諮問

讀誦是名菩薩法忍云何名菩薩隨佛教忍菩薩瞋惱毒心起時作是思惟此身從何而生從何而滅從我生者何者是我從彼生者何者是彼法相如是從何因緣起菩薩作是思惟時不見所從生亦不見所緣起亦不見從我生亦不見從彼起亦不見從因緣生作是思惟亦不瞋亦不惱亦不毒瞋怒之心即便減少是名菩薩隨佛教忍云何名菩薩無方所忍或有夜忍晝不忍或晝忍夜不忍或彼方忍此方不忍或此方忍彼方不忍或知識邊忍不知識邊不忍或不知識邊忍知識邊不忍菩薩不爾於一切時一切方常生忍心是名菩薩無方所忍云何名菩薩修處處忍有人於父母師長夫妻男女大小内外如是中生忍餘則不忍菩薩忍者則不如是如

父母邊生忍旃陀羅邊生忍是名菩薩修處
處忍云何名菩薩非所爲忍不以事故生忍
不以利故生忍不以畏故生忍不以受他恩
故生忍不以相親友故生忍不以愧赦故生
忍菩薩常修於忍是名菩薩非所爲忍云何
名菩薩不逼惱忍若瞋因緣煩惱未起不名
爲忍若遇瞋因緣時拳打刀杖手脚蹴蹋惡
口罵詈於如是中心不動者則名爲忍菩薩
若有人來起發瞋恚亦忍不起發瞋恚亦忍
是名菩薩不逼惱忍云何名菩薩悲心忍爾
時菩薩若作王若王等有大功業爲苦衆生
而作其主是苦衆生若來罵辱觸惱之時菩
薩不以我是主故而生瞋恚如是衆生我當
拔濟常爲擁護云何而得生於瞋惱是故我
今悲心憐愍不生忿恚是名菩薩悲心忍云

何名菩薩誓願忍菩薩作是念我先於諸佛
前曾作師子吼發誓願言我當成佛於一切
生死淤泥中爲拔諸苦衆生我今欲拔不應
瞋恚而惱於彼若我不忍尚不自度況利衆
生善男子譬如良醫善知治眼見諸衆生多

有患目或患眼翳或患眼膜種種患眼不可
稱計是醫若言我欲療治衆生眼患彼時醫
師本自盲冥佛言如此醫師能治他眼不除
蓋障菩薩摩訶薩白佛言不也世尊佛告除
蓋障菩薩摩訶薩欲除一切衆生無明瞋者
應先自除闇障後及於人若內無智慧能治
他疾是義不然以是因緣當修於忍不應生
瞋是名菩薩大誓願忍善男子具此十事是
名菩薩能淨於忍善男子菩薩復有十法名
爲精進滿足何等爲十如金剛精進無等精

進處中精進顯勝精進熾盛精進常恒精進
清淨精進不共二乘精進不輕賤精進不退
轉精進云何菩薩如金剛精進未解者令解
未涅槃者令得涅槃未安者令安未度者令
度未得阿耨多羅三藐三菩提者當令得阿
耨多羅三藐三菩提若作如是修行精進時
天魔波旬來謂菩薩言汝今何故作如是精
進徒自勤苦終無所獲何以故我亦會作如
是精進未解者令解未涅槃者令得涅槃未
安者令安未度者令度未得阿耨多羅三藐
三菩提者當令悉得如是等事皆是妄語但
誑凡愚無有真實我未曾見如是精進而得
阿耨多羅三藐三菩提者善男子我曾見無
量衆生如是精進有得阿羅漢涅槃如是精
進有得辟支佛涅槃魔王復言善男子雖行

精進未有得阿耨多羅三藐三菩提汝今思
惟疾捨是心空無所獲徒自勤苦汝今速求
二乘可得早離生死菩薩即作是念此是魔
說欲壞我心汝但少事而自憂已莫爲多事
反憂我耶隨所造業各得受報依止於業業
爲親友汝亦有此隨業受報依止於業業爲
親屬惡魔波旬汝今速疾復道還去汝惱我
故當長夜受苦魔即慚愧隱形而去是名菩
薩如金剛精進魔不能壞云何名菩薩無等
精進爾時菩薩所行精進超諸菩薩百千萬
億算數譬喻所不能及況餘聲聞二乘學者
而能及乎一切諸佛善法以精進力故悉能
攝取一切惡法無不捨離是則名爲無等精
進云何名菩薩處中精進勤不過分亦不懈
退如是精進名爲處中精進云何名菩薩高

勝精進菩薩發大精進願使現身如佛色相
若我得佛無見頂相圓光一尋佛之相好無
礙智慧大自在者願我悉得是名高勝精進
云何名菩薩熾盛精進譬如真金摩尼珠寶
無有垢穢光明熾盛端嚴殊顯真金精耀無
量焰熾摩尼寶珠煥然炳徹菩薩精進亦復
如是無諸垢翳何者是精進垢何者是精進
翳懈怠是精進垢懶惰是精進翳食不知足
是精進垢貪嗜睡眠是精進翳好樂親近是
精進垢不見無我是精進障如是名為精進

垢精進障除如是垢障是名菩薩熾盛精進
云何名菩薩常恒精進舉動威儀不離精進
行住坐卧不曾休廢身心不懈是名菩薩常
恒精進云何名菩薩清淨精進如上常恒精
進有所起惡不善之業能障道法能作衰損

皆悉除斷一切善法於涅槃因不作障礙能
助道法安止道處皆悉修廣增長熾盛乃至
微細一念之惡不令得起況復大惡是名菩
薩清淨精進云何名菩薩不共二乘精進菩
薩摩訶薩周遍十方如恒河沙數世界滿中
阿鼻地獄猛火熾盛如此世界外有極苦眾
生無依無救乃至若一眾生如是苦惱菩薩
能忍大火過無量恒河沙世界拔濟成熟一
眾生苦爲一尚爾況多眾生而不救濟一切
外道二乘學人所不能及是名菩薩不共二
乘精進云何名菩薩不自輕賤精進菩薩作
是思惟三世諸佛皆從微少精進修無量德
乃能久積苦行成等正覺是故我今因少精
進漸植德本不久亦應得佛不疑是名菩薩
不自輕賤精進云何名菩薩不退轉精進菩

薩不以己身精進微薄不以貧窮乏少財寶而生捨心常修精進向阿耨多羅三藐三菩提過去未來現在三世諸佛皆以積善微細精進悉得菩提我今不以微賤而自輕毀以微精進故爲一切衆生積集衆善成阿耨多羅三藐三菩提不爲已樂而入涅槃寧爲衆生久處地獄是名菩薩不退轉精進善男子具此十事是名菩薩滿足精進善男子菩薩摩訶薩復有十法名具禪波羅蜜何等爲十多集福德深厭諸惡能勤精進具於多聞不顛倒解解法向法利根聰明有純善心能解定智不著禪相云何名爲多集福德久於大乘積集善根在所生處常護持善戒遇善知識世世恒生種族刹利大姓婆羅門大家居士生處恒生正見家增長善法憶所修善方

便不捨常不離善知識菩薩諸佛漸漸增長觀察諸法世間大苦常爲災患之所逼惱無有暫停長爲衆苦無明所盲皆因愛欲欲爲根本我今不應同於凡夫親近於欲欲者諸佛世尊說從妄想生無量因緣毀訾過患譬如以木貫人心腎欲如利戟欲如劒刃欲如毒蛇欲如鋒火欲如膿爛不可觸近欲如聚沫欲如熱焰欲如幻化欲如夢想欲爲不淨令人臭穢欲如熟癰欲如腐敗爛肉作如是厭惡欲想剷除鬚髮捨離產業出家學道被法服衣而作沙門正法出家信家非家出家學道發大精進未得善法者能令使得未得智者能令得智未得證者當令得證如是因如是緣以是事故即得多聞於世諦第一義諦悉能宣說善知世諦即第一義諦善知不

顛倒法如法體相何者是善知法相正見正志正語正業正命正方便正念正定得見正道利根轉勝心常在道以利根故多生厭惡遠離大衆憤鬧之處遠離欲覺貪瞋邪見殘害之心遠離眷屬遠離名聞利養遠離一切

身二

七

身心常念自觀已心爲念善不善無記若念善應念勝善念勝善者心生歡喜起發信樂云何是勝善心三十七品云何是三十七品四念處四正勤四如意足五根五力七覺分八正道法是名勝善是真道支心猶不善極生厭惡多作觀察勤行方便斷於不善何等不善貪欲瞋恚愚癡貪欲有三種上中下何者是上貪欲欲心逼身正見衰損離欲心少離於慚愧云何離慚愧心若攝身靜念獨處林野爾時思惟欲覺增長熾盛貴於欲覺讚

歎欲覺以欲覺故作是思惟時無有愧心云何無慚以欲業故作欲因緣於父母所生懟恨語於尊重處而無畏難亦不羞愧自現有德以是欲故命終之時墮於惡趣是名上欲云何名爲中欲若受欲已心生厭離或起悔心是名中欲云何名爲下欲若摩觸之時欲想即息或共言語雖有染想生念即滅或見欲時欲想亦息是名下欲欲者一切衣服飲食供身之具悉名爲欲瞋恚亦有三種上中下何者爲上瞋若惱彼時深生忿怒或作五逆或五逆中作一一逆或誹謗正法等如是之罪非算數譬喻之所能及身壞命終墮大地獄受罪餘報得生人中膚體黑瘦兩目皆赤志逞常怒多懷擾害以是義故名爲上瞋云何名爲中瞋所作諸惡速疾變悔即修對

治之法是名中瞋云何名為下瞋或出惡言或起譏訶或習微惡業或時時起發尋生對治是名下瞋愚癡亦有三種上中下何者為上癡作惡不悔不生慚愧心無厭時如是名為上癡云何名為中癡身作惡時尋生變悔

身二

八

於同梵行邊發露懺悔不顯已德是名中癡云何名為下癡依如來所制非性重罪少有所犯是故名為下癡菩薩摩訶薩善心起時能迴貪瞋癡能除欲愛能除欲樂能除欲著以善心故令欲不起云何名為無記心此心起時不緣外不緣內不緣善不緣不善不從定不從智如從眠起目視不了不緣善惡名為無記若無記心生時菩薩方便自策發起善心令生歡喜安住於善是名菩薩得於善心以善心故觀察一切諸法如幻如夢如熱

時焰如呼聲響此是善法此非善法此法跡乘此法不跡乘菩薩摩訶薩觀於一切法發起善心以法為相心為先導當善持其心調順其心善持諸法調伏諸法見正法已以是緣故便得寂定心為境界以心繫心漸入寂

定以心住心正住三昧心寂定故便能專一心專一故次第無間得定心故心常寂靜心寂靜故心生喜樂便除欲愛諸惡不善有覺有觀定生喜樂成就初禪無覺少觀定生喜樂成就二禪除喜得樂念捨得第三禪離喜

身二

九

樂行捨心得第四禪除我見離憂喜捨苦樂淨念捨行四禪一切解脫離色想如虛空衆生心想虛空想等作一解脫觀以是故色想滅空想生惱壞想已滅無邊虛空想成從無邊虛空想以次觀識識無邊故虛空想滅觀

識漸損乃至少識名為不用處復觀此識若有若無是名非想非非想處滅諸想受是名滅定菩薩雖入滅定而不捨教化衆生亦不永樂滅定以為寂靜不捨滅定而能慈悲普覆衆生於滅定中乃至起悲喜捨心亦復如是菩薩爾時便獲五神通而不以十二門禪五神通等以為自足方求上法阿耨多羅三藐三菩提莊嚴之具功德滿足善男子具此十事是名菩薩具禪波羅蜜善男子菩薩復有十法名為智慧滿足何等為十具無我善善解業報善知有為法善解生死相續不絕善解生死出要之法善解聲聞辟支二乘之法善解摩訶衍善解遮魔業智慧不顛倒智慧無礙智慧善男子云何具無我善菩薩以智觀察色受想行識觀色不生不起不見起

因受亦不生不起不見起因想亦不生不起不見起因行亦不生不起不見起因識亦不生不起不見起因滅亦不生不起不見起因第一義諦亦不見不生不起世諦第一義諦但有假名而無實體雖知諸法虛空而不捨於精進深矜一切衆生如救頭然如救衣裳然勤修方便不懈不捨為一切衆生故而求阿耨多羅三藐三菩提果莊嚴具足是名菩薩無我善根云何名菩薩善知業報菩薩選擇觀察一切衆生皆如幻相如乾闥婆城水中之月體性空寂一切衆生深著我見及我所見以是因緣不見正道衆生作如是想若無我無人無衆生無壽者無丈夫者若悉皆無誰受善惡六趣差別菩薩摩訶薩雖知業報不斷不常不受不捨是名菩薩善知業報

云何名菩薩善知有爲而不取有爲相如實正見知有爲法迅速不停念念流動猶華上露如山澗水駛流赴下間無暫息亦如沙城無有牢固何有智者當生樂著而戀親愛見有爲法如是之相云何智者而生憂悲以是因緣深樂涅槃厭惡生死是名菩薩善知有爲法云何名菩薩善解生死流轉菩薩觀察一切衆生無明所盲漂流生死恒爲愛癡諸結所縛以是因緣故受以愛故造善惡業以業因緣故有有因緣故生生因緣故死憂悲苦惱衆苦聚集生死流轉互爲上下猶如水輪是故菩薩正觀生死如實而知是名菩薩善解生死流轉云何名菩薩善解生死出要之法無無明則無行無行則無識無識則無名色無名色則無六入無六入則無觸無觸

則無受無受則無愛無愛則無取無取則無有無有則無生無生則無老死憂悲苦惱衆苦聚集菩薩以如實智見十二因緣是名菩薩善解生死出要之法云何名菩薩善解聲聞辟支二乘之法菩薩觀察如此法時成須陀洹成斯陀含成阿那含成阿羅漢斷諸結漏得成辟支佛成辟支佛已如犀一角善解聲聞辟支佛法而不取證何以故我攝受一切衆生故作師子吼而作是言我當拔一切衆生曠野生死之苦以是故我今不應獨出生死是名菩薩善解聲聞辟支佛法云何名菩薩善解摩訶行法菩薩善學一切諸法善學一切諸法已而不得諸法相善修學道而不見道相不見能行者不見所行法亦不見所至到處以是因緣相貌而不墮於斷見是

名菩薩善解摩訶衍云何名菩薩善知遮魔業智慧菩薩善知不親近惡知者亦不至惡國而常遠離世俗談話不樂親近諸餘非法不求利養亦於此法不生欣樂一切結使能障菩提者悉皆遠離善知對治法是名菩薩

善知遮魔業智慧云何名菩薩不顛倒智慧善學世諦第一義諦及諸經論善學世間雜論爲成熟衆生故雖廣聞多學而不爲於顯已功德但爲成熟衆生雖明知世典而常尊佛法以爲最勝終不淪於外道邪見是名菩薩不顛倒智慧云何名菩薩無等智慧不見若天若人沙門婆羅門及諸外道與菩薩智慧等者除諸如來世尊等正覺餘天人阿脩羅無有能及菩薩智慧者是名菩薩無等智慧善男子具此十事是名菩薩滿足智慧善

男子菩薩復有十法名滿足方便何等爲十善解方便迴向善迴外道諸見善迴五塵善除疑悔善救護衆生善知衆生濟命善受供養善移聲聞辟支二乘學者入於大乘善知示教利喜善知供養恭敬云何名菩薩善解方便迴向一切所有若華若果若香若香樹若寶若寶樹若氎若氎樹一切空澤曠野無主非我所諸物盡皆晝三時夜三時迴心施佛以是善根迴向阿耨多羅三藐三菩提於修多羅經中讚歎供養三寶之處深生隨喜十方世界一切菩薩及諸衆生若起一念善根身心隨喜悉皆迴向香華供養諸佛形像塔廟以是善根願令一切衆生悉除破戒非法臭穢當使一切衆生皆得諸佛戒香之身若有掃塔塗地願使一切衆生悉得端正莊

嚴之具若以華蓋供養佛塔願一切衆生除煩惱熱若入僧坊塔寺願一切衆生入涅槃城若出塔寺願一切衆生永離生死若開門時願一切衆生開善趣門若閉門時願一切衆生閉惡趣門若欲坐時願一切衆生當坐

身二

十三

道場若欲起時願一切衆生於煩惱淤泥中能超出若右脇卧時願一切衆生得右脇涅槃若著衣時願一切衆生著慚愧衣若捉鉢時願一切衆生滿足佛法若欲食時願一切衆生悉得法食若大小便利願一切衆生蠲除垢穢無姪怒癡若洗手時當願衆生悉離染穢若洗脚時願一切衆生除煩惱垢若嚼楊枝時願一切衆生種種垢穢皆悉得除若身行止及舉動時願一切衆生悉得安樂若禮塔寺時願一切衆生亦皆敬禮是名菩薩

善解方便迴向云何名菩薩善迴外道諸見能令異學九十六種調伏出家欲調伏時而不貢高爲作師範要先恭事現爲弟子然後調伏隨諸外道所有威儀法則悉皆習學究盡勝彼令調伏已而反制之使爲弟子信受其語爾時便爲說言汝先所學法無有離欲亦無出要乃以正道誘化其心令立佛法是名菩薩善迴外道諸見云何名菩薩善迴五塵見諸衆生貪欲熾盛爲化彼故現作女身端正殊妙超諸女人使彼染著即復現身變爲死屍脰脹臭爛衆生見者悉生驚怖即便厭惡我今云何疾得遠離臭穢之身菩薩爾時即復本形而說法要皆令堅固無上道心是名菩薩善迴五塵云何名菩薩善除疑悔若見衆生作五逆罪及餘諸惡菩薩即語衆

生言汝今何爲愁苦如是彼人答言我作五
逆罪愁憂悔恨捨此身已當久受苦惱長夜
衰損無有義利菩薩爲現神變適其心念令
彼信伏便生信敬愛樂菩薩又復化作父母
而加逆害彼作是念菩薩神足威力無量猶
害父母況我愚癡而能不作菩薩答言我真
汝伴同作逆罪菩薩便爲說種種法令彼逆
罪即得輕微猶如蚊翅是名菩薩善除疑悔
云何名菩薩善能救拔衆生菩薩觀彼衆生
堪爲法器而造諸惡菩薩即爲現形種種說
法應見王身得度者即現王身應見王等身
得度者即現王等身應見刹利身得度者即
現刹利身應見婆羅門身得度者即現婆羅
門身應見天身得度者即現天身應見金剛
力士身得度者即現金剛力士身應見恐怖

身得度者即現恐怖身應見繫閉鞭打驚怖
身得度者即現繫閉鞭打驚怖身應見親友
愛樂身得度者即現親友愛樂身所應見者
皆爲現之是名菩薩善能救拔衆生云何名
菩薩善知衆生濟命菩薩摩訶薩見衆生無
所堪任不識正法唯知貪欲飲食衣服更無
餘求菩薩爾時爲示算數醫方種種技術如
是善者皆令學習悉使不乏衣服飲食是名
菩薩善知衆生濟命云何名菩薩善解受供
養菩薩爾時得大寶樹如須彌山悉能受之
若得少施微毫縷綆亦皆受用菩薩以何因
緣故大小皆受見衆生慳貪嫉妬無有施心
又見衆生出沒生死如水中魚深愍衆生漂
溺巨海爲作利益令使快樂受財寶已爲供
養佛法僧給施窮乏隨所施處而爲說法皆

發阿耨多羅三藐三菩提心是名菩薩善解
受供云何名菩薩善能移於二乘入於大乘
菩薩見衆生堪任大器乃至作聲聞辟支佛
二乘精進勤修苦行爾時菩薩令住大乘及
其徒衆悉皆令轉捨於小心爲繼佛種不斷
三寶故是名菩薩移於二乘安住大乘云何
名菩薩善能示教利喜未發菩提心者能令
發心懈怠懶惰者令勤精進若以少善而自
足者方便發起令具諸善若有虧損少戒生
大障礙而心遠離一切諸善者菩薩即爲說
法令其歡喜具修戒行是名菩薩善能示教
利喜云何名菩薩善能恭敬供養三寶出家
菩薩少欲知足不積財寶唯以法施爲利爾
時在閑靜處獨坐思惟我今何爲不作供養
佛想即自思惟種種運心供養諸佛如是思

惟已便能具足六度云何具足六度以種種
供養而具檀波羅蜜恒與一切衆生善是名
尸波羅蜜歡喜忍樂是名羼提波羅蜜身心
不懈是名毗梨耶波羅蜜專心不散是名禪
波羅蜜莊嚴衆行皆悉具足是名般若波羅
蜜菩薩如是靜處思惟時能具六波羅蜜是
名菩薩善解恭敬供養三寶善男子具此十
事是名菩薩具足方便

佛說寶雲經卷第二

音釋

十二

十六

愧被愧貌切慚也 蹴蹋蹴子六切踏
也奴板切面赤也 嗜利切 戰紀逆
踐慕各切 療治疾切 逞快也 迅速迅
也瞽瞍切 懟徒對切 逞快也 迅速迅
屬於容切 懟徒對切 逞快也 迅速迅
晉疾切 駛疾切 漂招切 縮古
並疾也 駛疾切 漂招切 縮古

嚼在爵切
 脰知也
 蚊翅
 翅翅無分切
 範則也
 誘與久切
 綆教導也
 絰力主切
 脰江切
 脰江切
 脰江切

佛說寶雲經卷第三

身三

梁扶南三藏曼陀羅仙共僧伽婆羅譯

善男子菩薩復有十法名方便發願何等爲
十不作卑下發願不作畏生死發願出過一
切衆生發願一切諸佛讚歎發願能摧伏一
切魔發願不爲他教故發願無邊發願不恐
畏發願無憂發願具足發願云何名菩薩不
卑下發願菩薩摩訶薩不爲三有受樂故發
願是名菩薩不卑下發願云何名菩薩不畏
生死發願不求二乘不爲厭惡生死不爲滅
除生死故發願是名菩薩不畏生死發願云
何名菩薩出過一切衆生發願菩薩願使一
切四生衆生悉成菩提而般涅槃而我或入
涅槃或不入涅槃是名菩薩出過一切衆生
發願云何名菩薩一切諸佛讚歎發願菩薩

發願我化一切衆生皆發阿耨多羅三藐三
菩提心行菩薩道乃至坐於道場我當勸請
令轉法輪佛若入涅槃我當勸請令久住世
利益衆生是名菩薩一切諸佛讚歎發願云
何名菩薩摧伏一切諸魔發願菩薩願使一
切衆生成佛時國土不聞惡魔名字是名菩
薩摧伏一切諸魔發願云何名菩薩不爲他
教故發願終不受他教故發阿耨多羅三藐
三菩提心自以智慧觀察世界衆生受無量
苦爲拔濟故發阿耨多羅三藐三菩提心是
名菩薩不爲他教故發願云何名菩薩無邊發
願菩薩不爲方所少緣發願菩薩整其衣服
右膝著地叉手合掌心生厭惡於十方一切
世界所有菩薩若坐道場勤修苦行初成佛
者轉法輪者當悉觀察照見我心勸請隨喜

願轉法輪一切十方菩薩從初發意行六波羅蜜皆作無量難行苦行乃至坐於道場降魔成佛及轉法輪於此一一善心我皆隨喜發阿耨多羅三藐三菩提心是名菩薩無邊發願云何名菩薩不恐畏發願菩薩從初發心聞深妙法不生驚畏聞佛本行無邊功德不生驚畏聞菩薩深遠遊戲神通不生驚畏聞菩薩深遠善權方便不生驚畏菩薩作是念佛菩提無量無邊世界無量無邊佛所成熟衆生無量無邊非我智力之所能知唯佛與佛乃能究竟故名菩薩不恐畏發願云何名菩薩無憂發願菩薩見諸衆生癡無慧目憊候難調不可降伏破戒懶惰衆惡悉具爲如此等深起厭心求生淨土願令我等不聞如是諸惡之名當行慈悲智慧具足菩薩發

心便作是念一切世界中少智衆生愚癡瘡痂無涅槃分不生信心者而爲一切諸佛菩薩之所棄捨如此衆生我皆調伏乃至坐於道場得阿耨多羅三藐三菩提發此心時一切魔宮悉皆震動十方諸佛發心讚歎莊嚴

淨土速成正覺是名菩薩無憂發願云何名菩薩具足發願菩薩發心誓願降魔成阿耨多羅三藐三菩提是名菩薩具足發願譬如油鉢若已平滿更投一滴終不復受菩薩成佛衆願滿足亦復如是更無減少一塵之願善男子具此十事是名菩薩方便具足發願善男子菩薩復有十法名力具足何等爲十人不輕力不爲他所伏力具福業力具智慧力具徒衆力得神通力自在之力陀羅尼力菩薩定持不可動力所言無二力云何名菩

薩人不輕力一切外道聲聞二乘無能過者
一切衆生亦無有與菩薩力等者是名菩薩
人不輕力云何名菩薩具福業力無有世間
出世間所修之福功德莊嚴能與菩薩力齊
等者是名菩薩具福業力云何名菩薩具智
慧力菩薩智力有所舉動於前後際無有錯
謬是名菩薩具智慧力云何名菩薩具徒衆
力菩薩徒衆不壞正見無毀威儀常修淨命
所攝大衆皆同菩薩正直之行是名菩薩具
徒衆力云何名菩薩具神通力菩薩以世俗
五通勝於聲聞二乘五通能以一塵容閻浮
提及四天下或千世界或二千世界或三千
大千世界乃至恒河沙等三千大千世界而
微塵不增世界不減其中衆生亦不迫迨無
覺知想不相妨礙是名菩薩具神通力云何

名菩薩得自在力菩薩有自在力欲使三千
大千世界種種珍寶遍滿其中即如其意是
名菩薩自在之力云何名菩薩得陀羅尼力
菩薩若聞無量無邊諸佛說法異文異字能
於一念種種音聲悉皆受持思惟修行是名
菩薩陀羅尼力云何名菩薩受持無虧動力
一切衆生無能擾壞令其心亂是名菩薩定
持不虧動力云何名菩薩所言無二力菩薩
心思後言口無二語唯除方便利益之說是
菩薩言無二力若有記莂終不錯謬一切衆
生所有智慧無能出過菩薩之者善男子具
足此事是名菩薩得力具足善男子菩薩復
有十法名具足智何等爲十知人無我智具
足知法無我智具足一切處遍知諸方智具
足善知禪定境界處所智具足智持具足無

等智具足善知衆生根行智具足無作智具足善知一切法相智具足善知出世間智具足云何名菩薩知人無我觀五陰不堅無牢固虛妄無真實乃至滅謝亦不見有去菩薩作是念此五陰無我無衆生無壽者無養育無人凡夫愚人謂實有我故妄取我想猶如鬼魅妖異所著衆生妄計亦復如是或陰即是我我即是因或因是我我所是陰著虛妄我不見真實於生死中如旋火輪虛妄無實菩薩如實能知是名菩薩知人無我具足

云何名菩薩觀法無我知如實相見生見滅知一切物猶如假借但有名用假施設生無有實體假施設法亦不斷不常但從緣而生從緣而滅菩薩如實而知諸法真實是名觀法無我具足云何名菩薩一切處通知一切

處通知者非一剎那之中非一剎那中不知非此方知彼方不知而能普於十方得無礙智是名菩薩一切處通知云何名菩薩善知禪定境界處所知聲聞定知辟支佛定知菩薩定知諸佛定如是諸定皆悉了知聲聞二

乘但知自分境界餘則不知菩薩定者知已境界兼知二乘及如來禪定究竟之相以佛力故亦悉能知是名菩薩善知禪定境界處所云何名菩薩智持具足菩薩善知聲聞持辟支佛持菩薩持況餘衆生而不能知是名

菩薩智持具足云何名菩薩無等智具足一切外道二乘諸智無有能及菩薩智者唯除如來一切種智是名菩薩無等智具足云何名菩薩善知衆生根行具足菩薩能以淨無礙智遍觀世界衆生有衆生能生菩提有衆

生不能生菩提有衆生滿足菩提有衆生不
滿足菩提有衆生住於初地乃至住於十地
有衆生坐於道場有成正覺有轉法輪乃至
入般涅槃有聲聞乘涅槃有辟支佛乘涅槃
有生善趣者有生惡趣者是名菩薩善知衆
生根行具足云何名菩薩無作智具足於四
威儀行住坐卧念念無作心恒成就譬如
有人於出入息乃至睡眠常無所作菩薩如
是心無思惟亦非造作而無礙智自然成
就是名菩薩無作智具足云何名菩薩善知一切
法相具足了達諸法皆同一相云何一相皆
盡空相如幻相虛妄相是名菩薩善知一切
法相具足云何名菩薩善知出世間智具足
菩薩知無漏智出一切世間諸智是名菩薩
出世間智具足善男子具此十事是名菩薩

得一切智滿足善男子菩薩復有十法名得
地三昧何等爲十如地廣大無邊如地一切
衆生依止存濟如地於一切衆生悉有養育
之恩終不計恩如地普能容受諸大雲雨能
爲一切衆生依止住處能生善種及一切種
如大寶器能出一切大藥不可傾動不驚不
畏云何名菩薩如地廣大無邊周匝十方無
邊無量菩薩亦爾功德智慧莊嚴願行無邊
無量是名菩薩如地廣大無邊云何名菩薩
如地一切衆生依止存濟各存所欲稱其拯
給同濟無礙菩薩亦爾施成忍辱精進禪智
乃至衆具皆悉施與之而心無限礙是名菩
薩如地一切衆生依止存濟云何名菩薩有
養育之恩而不望報猶如大地等無好惡加
報不欣無亦不恨是名菩薩有養之恩而不

望報云何名菩薩如地普能容受大法雲雨亦如大地天澍雲雨普皆容受無不堪持菩薩摩訶薩亦復如是一切諸佛興大密雲普澍法雨如其所說悉能受持是名菩薩如地普能容受大法雲雨云何名菩薩能爲一切衆生依止住處廿三又如大地草木叢林一切衆生行住坐卧皆依於地菩薩亦爾一切衆生修行善趣二乘學法及以涅槃一切皆因菩薩而有是名菩薩能爲一切衆生依止住處云何名菩薩善種子之所依處譬如大地一切種子依地而生菩薩亦爾一切善業天人種子皆依菩薩而生是名菩薩善種子之所依處云何名菩薩如大寶器譬如大地能出衆寶是諸寶物皆出於地菩薩摩訶薩亦復如是功德善寶一切樂果悉出菩薩是名菩

薩如大寶器云何名菩薩能出一切大藥譬如大地出衆妙藥能治種種諸病菩薩摩訶薩亦復如是能出一切諸妙法藥能除一切諸煩惱病是名菩薩能出一切大法藥器云何名菩薩不可傾動譬如大地風不能動蠅蚋蚤虱不能虧損菩薩摩訶薩亦復如是一切內外諸緣逼惱不能擾動是名菩薩不可傾動云何名菩薩不驚不畏譬如大地師子虎狼龍象雷電哮吼不能驚畏菩薩摩訶薩亦復如是一切外道九十六種所不能動是名菩薩不驚不畏善男子具此十事是名菩薩得地三昧善男子菩薩復有十法譬如大水何等爲十如水流注溉潤赴下能生衆生善芽種子欣樂敬信浸爛一切煩惱根芽如水清淨不濁除滅一切熾熱之患能除貪欲

愛心之渴深廣難度如水澆溉高下皆滿能除一切諸結塵垢云何名菩薩如水流注溉潤赴下生長草木而各滋茂菩薩亦復如是以諸功德如水溉下流潤微善亦能增長是名菩薩如水流注溉潤赴下云何名菩薩能

身二

生衆生善芽種子如水能潤草木叢林悉得生長菩薩以禪定水澆潤覺意正直道支令得增長漸漸長養成一切智樹是名菩薩能生善芽種子以若干種諸佛法果利益衆生菩薩摩訶薩亦復如是以清淨法增長流潤是名菩薩能生善芽種子云何名菩薩欣樂敬信如水自濕亦能濕彼菩薩亦復如是自身恭敬信樂亦能令他恭敬信樂是名菩薩恭敬信樂云何名菩薩浸爛一切煩惱根芽譬如大水能浸草木根芽令使爛壞菩薩摩

訶薩亦復如是修禪定水浸煩惱根芽令悉爛壞乃至結使習氣垢穢悉皆無餘是名菩薩浸爛壞一切煩惱根芽云何名菩薩如水流淨不濁水之體性常恒不濁菩薩摩訶薩亦復如是體性不濁云何菩薩體性不濁結

身三

使貪欲瞋恚愚癡悉斷無餘善護諸根清淨如水是名菩薩如水流清淨不濁云何名菩薩除滅一切熾熱之患譬如夏月以水洗浴身則清涼菩薩亦復如是能以法水除煩惱熱是名菩薩除滅一切熾熱之患云何名菩薩能除貪欲愛心之渴譬諸泉水能除人渴菩薩摩訶薩亦復如是能以法水悉除衆生五欲之渴是名菩薩能除貪欲愛心之渴云何名菩薩深廣難度禪定智水一切衆魔及諸外道無能度者是名菩薩深廣難度云何名

九

菩薩如水澆溉高下皆滿菩薩亦復如是於
善惡衆生以法水普潤令不苦惱是名菩薩
如水澆溉高下皆滿云何名菩薩能除一切
諸結塵垢菩薩以禪定水淹灑六塵諸根清
淨色聲不染是名菩薩能除一切諸結塵垢
善男子具此十事是名菩薩譬如大水善男
子菩薩復有十法譬如大火何等爲十能燒
一切結使之薪能成熟一切諸物能乾煩惱
淤泥如炬火聚如火照明能令驚怖能令安
慰若有利養與衆共之爲人供養人不敢輕
云何名菩薩能燒一切結使之薪如火能燒
草木及諸叢林菩薩亦爾以智慧火能燒煩
惱結使叢林是名菩薩能燒一切結使之薪
云何名菩薩如火能成熟一切諸物菩薩亦
復如是以智慧火悉能成熟一切佛法堅固

不壞是名菩薩成熟一切諸物云何名菩薩
能乾煩惱淤泥如火能乾濕物菩薩亦爾能
以智火乾有漏淤泥是名菩薩能乾煩惱淤
泥云何名菩薩如炬火聚若人爲寒所逼得
火則除菩薩亦復如是見諸衆生爲於煩惱
寒苦所逼菩薩以智慧火能令悉暖是名菩
薩如炬火聚云何名菩薩如火照明譬如
人在雪山頂燒大炬火周匝百里及二百里
皆悉照明菩薩摩訶薩亦復如是於無明山
頂然智慧火聚於百千世界皆得照明是名
菩薩如火照明云何名菩薩能令驚怖譬如
麋鹿虎豹見火驚恐悉皆遠走若天若魔及
魔眷屬見菩薩智火威德皆悉遠走是名菩
薩能令驚怖云何名菩薩能令安慰譬如
有人在曠野黑闇中迷失方所遙見火聚便往

趣之或值聚落放牧人處得到彼已恐怖悉除心得安慰菩薩摩訶薩亦復如是衆生於生死曠野黑闇之中迷失方所遙見菩薩火聚而往趣之到已煩惱怖畏悉得消除是名菩薩能令安慰云何名菩薩利養與衆共有譬如大火能令王若王等旃陀羅男女等悉得火溫菩薩摩訶薩亦復如是與一切衆生王若王等若旃陀羅男女等以智慧火消煩惱冰悉令得溫是名菩薩利養與衆共有云何名菩薩爲人供養譬如大火剎利婆羅門城邑聚落悉皆供養菩薩摩訶薩亦復如是爲天人阿脩羅及魔眷屬悉皆恭敬供養如世尊像是名菩薩爲人供養云何名菩薩人不敢輕譬如有人得一少火以能燒故心不敢輕菩薩摩訶薩亦復如是初發一念之善

未有大力天人阿脩羅及魔眷屬無能敢輕者何以故如是不久當坐道場成阿耨多羅三藐三菩提是名菩薩人不敢輕善男子具此十事是名菩薩譬如大火善男子菩薩復有十法猶如虛空何等爲十廣大無礙寂滅無相無邊空智無邊空慈廣大如法界知一切法相如虛空一切法不住出過一切形相出過一切思議量數善男子具此十事是名菩薩猶如虛空善男子菩薩復有十法心如虛空何等爲十若心所喜樂亦不著心不喜樂亦不瞋於色聲香味觸亦不著不瞋乃至於一切法亦不著不瞋於利衰毀譽稱譏苦樂於此四法亦不著不瞋善男子具此十事是名菩薩心如虛空善男子菩薩復有十法猶如滿月何等爲十能與一切衆生作清涼

樂見者愛樂能使善法日日漸增能令惡法日日損減如月盛滿體相勝妙體性清淨得無上乘常自莊嚴得法喜樂乘第一乘有大神通威德自在云何名菩薩能與一切衆生作清涼樂如月天子初出之時悉與衆生清涼快樂而衆樂觀心無疲厭菩薩之月亦復如是除其煩惱鬱蒸之熱皆令衆生得清涼樂歡喜愛樂是名菩薩能與一切衆生作清涼樂云何名菩薩見者愛樂如月初出衆生喜見利喜快樂菩薩之月亦復如是初出之時衆生喜見無不悅樂諸根寂定如水澄清威儀具足是名菩薩見者愛樂云何名菩薩能使善法日日增長如月初出日日圓滿菩薩之月亦復如是從初發心漸漸增長乃至菩薩坐道樹下功德滿足是名菩薩能使善

法日日增長云何名菩薩能令惡法日日損減譬如黑月圓滿光明以漸損減至月盡時光明悉滅隱蔽不現菩薩一切衆惡次第漸滅乃至菩提悉皆除盡是名菩薩能令惡法日日損減云何名菩薩如月盛滿如從月初至盛滿時衆所瞻仰刹利婆羅門城邑聚落一切男女無不稱讚菩薩之月亦復如是常爲天人一切衆生皆悉稱讚是名菩薩如月盛滿云何名菩薩體相清淨如月天子身相清淨是本業果報菩薩摩訶薩亦復如是無垢清淨從化而生不由父母精氣而生從法而生是名菩薩體相清淨云何名菩薩得無上乘如月天子乘於淨乘照四天下菩薩摩訶薩亦復如是乘於大乘能使無量百千萬億世界衆生悉皆照明是名菩薩得無上乘

云何名菩薩常自莊嚴如月天子華髮顯現
菩薩摩訶薩亦復如是常以功德瓔珞而自
莊嚴是名菩薩常自莊嚴云何名菩薩得法
喜樂如月天子遊戲五欲心常樂著菩薩亦
復如是遊戲諸法心常喜樂不染五欲是名

身三

十三

菩薩得法喜樂云何名菩薩有大神通威德
自在如月天子有大威德菩薩亦復如是具
諸功德自在智慧神通變化隨意無礙是名
菩薩有大神通善男子具此十事是名菩薩
如月天子善男子菩薩復有十法爲名如日

何等爲十能除無明黑闇能令信心開敷能
令十方周匝皆暖能令善法生長能令有漏
滅沒能作照明能使邪道異見蔽障不現能
令高下丘坑悉顯能令善業皆悉得起能令
智者喜樂愚者增惡云何名菩薩能除無明

黑闇譬如日出衆闇皆息菩薩日出能除衆
生無明之闇譬如日出時衆華開敷菩薩日
出應受化者亦皆開敷如日出時周匝十方
能令使暖菩薩日出功德智慧令十方暖不
擾衆生如日將出見其明相知有日出菩薩
亦復如是以智光明照諸世間衆生則知菩
薩日出如日入時諸方昏冥衆物不現菩薩
以智慧光入諸三昧煩惱昏冥一切結漏悉
滅不現如日出時光照闇浮提滅一切闇菩
薩智光亦能普照如日出時翳諸小明螢火
之光悉不復現而日無心翳諸小明法相自
爾菩薩日出則翳諸異見群邪外道如日出
時於闇淨提高下好惡悉皆顯現菩薩日出
時正道邪道亦各差別邪謂八邪正謂八正
如日出時田夫耕農諸作悉起菩薩日出信

心衆生普皆修善如日出時善人樂見竅盜衆生悉惡不喜菩薩日出賢智樂見群邪外道一切不喜善男子具此十事是名菩薩如日善男子菩薩復有十法譬如師子何等爲十無所畏不畏大衆去終不還能師子吼具足辯才樂處林野在於山窟摧伏大衆具勇猛力善能守護善男子云何無所畏譬如師子往還出入無所忌難何以故不見與已等故菩薩摩訶薩亦復如是周旋往返無所畏難何以故不見與已等故譬如師子不畏大衆菩薩摩訶薩亦復如是諸有大衆欲來講論不生畏難心亦不高不下譬如師子心無怯弱臨陣戰鬪而心不退直進不還菩薩亦爾如師子吼飛落走伏鮫魚龜龍水性之屬潛隱水底人畜皆驚菩薩亦爾作無我師子

身三

十四

吼能令一切外道野干著我見者十方驚走菩薩不欲令彼生其驚怖但欲除彼我見心故亦爲化餘信心衆生如師子王勇猛無畏遍觀四方心無怯弱菩薩摩訶薩亦復如是其行純淨常諦觀察三昧智慧譬如師子樂處林野菩薩摩訶薩亦復如是常樂閑獨離於慣鬧又如師子樂處山窟菩薩亦爾樂處禪定三昧山窟譬如師子無所結縛菩薩摩訶薩亦復如是悉已遠離結使重擔而行無染著譬如師子無有伴黨能摧諸軍衆菩薩摩訶薩亦復如是獨坐道場摧伏魔衆善男子猶如師子近聚落住能令麀鹿不害苗稼菩薩亦爾隨住方面能令衆魔一切外道不壞正法善男子具此十事是名菩薩譬如師子善男子菩薩復有十法名爲善調何等爲

身三

十五

十菩提心堅牢修治菩提守護諸根趣向正道善持重擔爲衆生故不辭勞苦正命自活能除諂曲虛妄之說幻惑悉除心常正直善男子具此十事是名菩薩善調善男子菩薩復有十法名爲善乘何等爲十雖行禪定恒修空相雖盡煩惱障而常修道善順佛教而無所違等觀諸法善解法界心常自卑如旃陀羅善除憍慢貢高吾我見法決定無有疑悔善察諸法得決定相善於正道不隨他教善向菩提爲世福田善男子具此十事是名菩薩善乘善男子菩薩復有十法譬如蓮華何等爲十其體清淨不著於水不染少惡戒香具足修清淨行和顏悅色柔輒不鞭見者皆吉心意調熟生已有想云何不著如蓮華生水淤泥不染菩薩雖生世間而不爲世法

所著何以故得方便智慧故猶如蓮華水不能染菩薩亦爾不爲少惡之所染著如蓮華生處香氣滿中菩薩亦爾隨所住處戒香悉滿譬如蓮華隨所生處體性清淨利利婆羅門城邑聚落之所稱讚菩薩摩訶薩亦復如是戒行清潔天人阿脩羅夜叉乾闥婆迦樓羅緊那羅摩睺羅伽人非人等之所稱讚常爲諸佛之所護念如蓮華開敷衆皆愛樂菩薩摩訶薩亦復如是和顏悅色諸根清淨譬如蓮華柔輒不鞭菩薩如是體性柔輒言無

身三

十六

麤獷譬如蓮華常是吉相乃至夢中亦名爲吉有義有吉菩薩摩訶薩亦復如是一切是吉究竟必得證一切智以是義故名一切吉譬如蓮華未開敷時不名具足華既開敷則名清淨一切具足菩薩摩訶薩亦復如是慧

覺開敷是名為佛如蓮華開敷能令眼見快
樂香氣充滿身觸柔軟心得喜悅則意受樂
菩薩摩訶薩亦復如是智慧成就慧光明相
能令見時眼得清淨聞時耳得清淨戒香遠
聞鼻得清淨觸身供養身得清淨思惟功德
意得清淨蓮華生時生已有想佛及菩薩四
天王等若見菩薩出時亦皆守護生已有想
善男子具此十事是名菩薩譬如蓮華

佛說寶雲經卷第三

音釋

懽懽 懽力董切懽懽力計切
迫迫 迫博陌切迫迫也
蠶風 蠶風子切蠶風也
鬱烝 鬱烝于物切鬱烝熱氣也
瘡瘡 瘡度切瘡瘡也
蠅蠅 蠅丙陵切蠅蠅也
鯨鯨 鯨古交切鯨鯨也
鯨鯨 鯨古交切鯨鯨也
鯨鯨 鯨古交切鯨鯨也

也
鹿麋獐
獐古猛切

十七

佛說寶雲經卷第四

身四

梁扶南三藏曼陀羅仙共僧伽婆羅譯

善男子菩薩復有十法名勝大心何等爲十
滿足諸波羅蜜故名勝大心滿足一切佛法
故名勝大心化一切衆生故名勝大心成佛

身四

道樹得阿耨多羅三藐三菩提故名勝大心
初成正覺轉於法輪若沙門婆羅門若人若
天魔梵所不能轉及餘世間亦不能轉而我
當轉故名勝大心菩薩爲欲利益衆生不但
於此世界乃至於無量無邊世界悉以正法
攝取衆生故名勝大心菩薩以智慧船爲欲
度此生死大海流轉衆生故名勝大心衆生
無救無依無舍無主我當親友爲作歸依舍
宅故名勝大心欲示如來威德自在我當爲
作佛師子吼我當遊戲佛之神通欲現龍象

威儀視不迴顧欲使天人一切衆生無與等
者若魔與梵沙門婆羅門及阿脩羅無與等
者故名勝大心佛大威德所化度者我欲度
之非凡小行非羸弊行非是難行非下劣行
故名勝大心善男子具此十事是名菩薩最
勝大心善男子菩薩復有十法名清淨心何
等爲十體性具足體性不動體性質直無虛
偽相除諸惡行不發聲聞心不發辟支佛心
不自爲已結使垢障而修功德少思尚憶沉
復大恩而不念報施恩於人而不自恃言行
相應終不謬失不隱己過不譏他短菩薩終
不外現軟語而心懷恨亦不顰蹙瞋色卒暴
令惱衆生自無諍心亦不令他而起於諍不
作兩舌破壞鬪亂於人身常恭敬所言真實
言行相稱作業皆善於如來法不說過惡云

何不說過惡菩薩發菩提心剷除鬚髮被著
法服如來法中而得出家不畏王故出家不
畏王臣故出家不作盜賊故出家不負債故
出家不怖畏故出家不為邪命故出家信心
故出家得出家已恒求善法親近善友隨順
善友於善知識所聽受善法聞法修行心不
憍慢終不顛倒妄取於法為除顛倒令入正
道入正道已便得正見得正見已去阿耨多
羅三藐三菩提不遠善男子具此十事是名
菩薩清淨心善男子菩薩復有十法名深信
不疑何等為十信如來身密信如來口密信
如來意密信諸菩薩所行信菩薩法信於諸
佛隨所起作皆令滿足信諸佛出生信諸佛
一乘信諸佛深遠音聲信諸佛隨應眾生說
法云何信如來身密信如來法身信如來寂

滅信如來無等無量身信如來堅固身信如
來不壞身信如來金剛身從如實生信知不
虛誑亦不生疑惑是名信如來身密又復思
惟聞如來口密現前受記密受記未發心受
記初發心受記信諸佛常以四依說法信諸
佛智無失信諸佛口無失信諸佛如上所說
言不虛妄何以故諸佛已盡一切過故離一
切垢故除一切塵無一切熱盡諸結業自在
無礙心常寂滅不濁不穢澄潔清淨若使如
來有身口過則無是處如實不虛不妄決了
此處不生疑惑是名信如來口密菩薩又作
是念聞如來意密心有所作皆隨智慧聲聞
緣覺一切菩薩則不能了唯除如來欲使知
者何以故如來智海甚深難度不思議故超
過一切心意表故無量無邊與虛空界等出

過一切外道占相卜筮呪術所知心常如實
無有虛妄復聞菩薩爲衆生故所作事業不
生疲厭不生驚畏志力堅實荷負重擔能生
大欲滿足諸波羅蜜一切佛法以漸而滿其
心無礙無與等者堅固精進堅固莊嚴堅固
智慧堅固誓願不動誓願無等誓願何以故
稱菩提相故以漸增廣乃至滿足如實知之
無有虛妄心無疑惑云何能修信不疑作是
念從初發心乃至坐於道場得無障無礙遍
知一切法明了無翳得天眼天耳他心宿命
如意足智漏盡智於一剎那頃悉知三世以
如是智觀衆生界見衆生身業不善口業不
善意業不善誹謗賢聖起大邪見亦知作邪
見因緣身壞命終墮大地獄觀如是衆生身
業修善口業修善意業修善不謗賢聖正見

成就以是因緣身壞命終生於天上如是觀
諸衆生善惡差別而作是念我本修菩薩道
時發大誓願若我自成菩提亦使他成我誓
願滿足言行真實無有虛妄而於此處亦無
疑惑我聞如來唯有一乘此事真實而不顛
倒無有虛妄何以故譬如閻浮提多諸小渚
是諸小渚皆依閻浮提住亦同名閻浮提如
來一乘亦復如是一切諸乘皆出大乘是故
一乘名如來大乘亦於此中不生疑惑如實
而知是以菩薩信如來乘亦曾聞如來種種
說法種種修多羅力四無不真實何以故如來隨
所化衆生隨問何法稱彼而答然於此處如
實能知信受不疑曾聞諸佛深遠妙聲此事
真實心無所惑何以故諸天以少修福尚得
深妙柔軟之聲況復如來具足無量百千萬

億功德深信此處不生疑惑是名菩薩信於如來深遠之聲又信如來能以一音演說諸法隨其類根悉除疑惑而諸衆生皆謂世尊獨爲已說佛以一音演說諸法衆生隨類亦各信解非作想亦非不作想如實而知無有虛妄能於此處不生疑惑善男子具此十事是名菩薩深信不疑也善男子菩薩復有十法譬如大海何等爲十是大寶藏深遠難度廣大無量次第漸深不與煩惱同處而宿寂滅一相衆流競注皆悉容受潮不失時能爲他人作歸依處而無竭盡云何菩薩是大寶藏亦如大海一切衆寶皆出其中間浮提人悉來競取不能令滅菩薩亦爾猶如寶藏無邊衆生悉以信心修菩薩行功德寶藏亦復不減是名菩薩如大寶藏譬如大海深廣難

度菩薩亦復如是智慧法海一切衆魔及諸外道無能度者是名菩薩深廣難度譬如大海廣大無邊菩薩亦爾功德智慧廣大無邊是名菩薩猶如大海深廣無邊譬如大海次第漸深菩薩摩訶薩成一切智以漸轉深是名菩薩猶如大海以漸轉深譬如大海不宿死屍何以故海法爾故菩薩法海一切結漏煩惱死屍及惡知識亦不同宿何以故菩薩法爾故譬如大海衆流注中皆同一味菩薩摩訶薩亦復如是白淨善業無量一切功德到種智海亦同一味等無差別譬如大海能容百千衆流然其大海不增不減菩薩亦爾聽受一切佛法亦爲衆生分別解說而無增減是名菩薩猶如大海不增不減云何譬如大海潮不過限菩薩亦復如是於所應成熟

衆生亦潮不過限猶如大海一切大身衆生
依止窟宅菩薩摩訶薩亦復如是爲一切大
心衆生作依止窟宅是名菩薩猶如大海依
止窟宅譬如大海無有窮盡菩薩摩訶薩亦
復如是爲一切衆生如應說法亦無窮盡善
男子具此十事是名菩薩譬如大海善男子
菩薩復有十法名微細智何等爲十善知出
要善知出要法善知出一切法等同一相善
知一切法如幻化善知一切法相善知甚深
十二因緣善知諸業不可思議善知一切法
義善知如實義善知如實智善男子云何名
菩薩善知出要菩薩能以智慧觀察一切衆
生貪瞋熾然愚癡闇冥思惟如是衆生云何
出要觀察等同一相知一切法如幻相如實
知一切法能度甚深因緣能知業不可思議

知一切諸法無相而知種種諸業能知緣起
及諸業相以如是微細智故於諸佛所說法
悉了其義以解義故所見真實以見真實故
便能度脫衆生生死善男子具此十事是名
菩薩微細智善男子菩薩復有十法得隨應
辯何等爲十佛如是說一切諸法無我無衆
生無壽命無人無作者無知者無見者一切
諸法悉如是相一切法空一切法虛妄欺誑
無主一切法妄相無實皆從因緣起善男子
具此十事是名菩薩隨應辯善男子菩薩復
有十法名爲辭辯何等爲十言論無滯語無
竭盡言辭柔潤悅澤無窮不懼大衆辭不卑
小辭無畏恐辭無與等者言不爲他所惡言
雖無量而不離四依義善男子具此十事是
名菩薩辭辯善男子菩薩復有十法名爲淨

辯何等爲十辭不謾吃辭無恐懼辭不卑劣
辭不麤高義不卑小辭無闕短其聲清徹聲
無闕短言則應時無有漏失辯不麤曠云何
名菩薩得不謾吃辯以無大衆威德畏故言
不謾吃云何名菩薩得不恐怖辯以體性正
直故無所忌云何名菩薩得不卑劣辯以何
因緣故菩薩處於大衆猶如師子無所忌難
云何名菩薩辭不麤高以何因故除結使故
善男子有煩惱故辭有麤高云何名菩薩義
不卑小以何因故善得法故已解深法其義
明了云何名菩薩辭無闕短以何因故善解
諸論故若解論少則言辯有闕云何名菩
薩聲無闕短何以故菩薩悉解一切諸音聲
故云何名菩薩知時而語若應前語不著於
後若應後語亦不著前何以故菩薩善知時

故云何名菩薩辯不麤曠非所喜者則不爲
說何以故一切口過由諸結習以斷惡故所
言柔輒菩薩摩訶薩無不了辯何以故菩薩
諸根已悉利故善男子諸根闇鈍故有不了
辯利則不爾善男子具此十事是名菩薩淨
辯善男子菩薩復有十法名樂說辯何等爲
十愛語不輦覺語義語法語等語不自高語
不輕他語不染語不惱觸語種種言辯善男
子菩薩愛語能令衆生心生欣樂菩薩不輦
覺語和顏悅色咸使安慰菩薩義辯能以美
語令衆悅樂菩薩法辯教授利益菩薩等辯
常以等心爲衆生說法能令衆生一切悉皆
喜悅菩薩不以自高說法除去憍慢自是心
故菩薩同事說法悅衆生故菩薩不輕他說
法心能專一故菩薩不染語堅持淨戒悅衆

生故菩薩不惱觸語以忍辱力悅衆生故菩薩種種言辯能以樂說悅衆生故善男子具此十事是名菩薩樂說辯才善男子菩薩復有十法名善說法能令衆生信受何等爲十堪任法器者而爲說法稱其根性而爲說法不爲譏訶者說法不爲外道異見者說法不爲憍慢無誠心者說法不爲無信心者說法不爲諂僞虛誑者說法不爲求活命者說法不爲求利養慳貪嫉妬者說法不爲顛狂愚癡聾瘡者說法善男子菩薩以何因緣不作法慳已所得法悉與衆生令他信解不爲師匠祕而不說菩薩終不於衆生起不慈愍心亦不外於衆生但不任法器者則入捨心除蓋障菩薩自佛言世尊而此衆生若不爲說者當爲誰說佛言有信心者我當爲說善根

成就堪任法器者當爲說之於過去佛種種善根心不諂曲無虛僞者亦非幻惑詐現威儀者不求名聞爲利養者常爲善知識之所守護者有智聞之能隨信解者諸根利者聞法能行勤精進者能隨順佛教者若有如是善男子等諸佛菩薩而爲說法善男子具此十事是名菩薩能善說法令衆生信受之善男子菩薩復有十法名爲說法法師何等爲十修習佛法而能說法亦不見法而能修習亦不見法能斷結使而爲說法亦不見所斷結使亦不見法厭惡離欲寂滅作如是說法亦不得厭惡亦不得離欲亦不得寂滅相得須陀洹果說法不見有須陀洹相得斯陀舍果說法不見有斯陀舍相得阿那含果說法不見有阿那含相得阿羅漢果說法不見有

阿羅漢相得辟支佛果說法不見有辟支佛相斷除著我說法亦不見我不見著見業果報說法亦不見業果報相何以故菩薩觀諸假名不必依法名中無法法中無名但以世俗假設名字流布世間世諦故而有假名於

第一義諦觀之則無悉是虛妄誑惑凡夫善男子具此十事是名菩薩說法法師善男子菩薩復有十法名爲堅法何等爲十菩薩摩訶薩雖觀色真實而不壞色相觀受想行識真實亦不壞受想行識相菩薩雖觀欲界真實而不壞欲界相雖觀色界真實而不壞色界相雖觀無色界真實而不壞無色界相雖觀諸法真實而不壞諸法相雖觀諸法真實而不壞於假名衆生雖觀諸法虛寂而不畢竟墮於斷見雖觀諸法真實而不壞於正道

菩薩以巧方便智慧善知有無而不取相善男子具此十事是名菩薩堅法善男子菩薩復有十法善知法界何等爲十有慧依善知識能勤精進遠離陰蓋清淨恭敬多習空觀除著諸見趣向於道所見真實善男子菩薩有慧習近善知識見善知識愛敬喜悅於善知識生世尊想依善知識住因善知識故得勤精進因善知識故能除一切惡法雖滿足一切善法而勤精進不倦除滅陰蓋以無蓋障故而勤修道得身口意業清淨除諸習惡身四得清淨故能恭敬供養得恭敬供養故而得空觀修空觀故除諸假名除諸假名故能向正道能向正道故能見真實除蓋障菩薩白佛言世尊云何名爲見真實佛即答言所見不虛名爲真實除蓋障菩薩白佛言世尊云

何名真實佛復答言不虛妄法名爲真實除蓋障菩薩白佛言世尊云何名爲不虛妄佛即答言如實非不如實名不虛妄除蓋障菩薩白佛言世尊云何名爲如實佛即答言此法唯可心知難以口說非是文字所能宣釋除蓋障菩薩白佛言世尊云何法相離於文字佛答言言語道斷出過一切心所行處離諸戲論無造無作亦無彼此非籌量計校之所能及亦非相貌過於一切凡愚所見出過魔界出過一切結使處所出過一切心意識表不住寂滅賢聖處所而諸賢聖之所證知善男子具此十事名爲究竟如實是一切智所說不思議境界不二境界除蓋障菩薩白佛言世尊是如實相云何證云何見佛告善男子出世間智乃能證見自得此法除蓋障

菩薩復白佛言世尊此法體性究竟清淨非染汙法是澄淨法微妙最勝法常住不動非敗壞法有佛無佛法性常爾菩薩摩訶薩精勤修行難行苦行百千萬億難行苦行爲得此法安立衆生除蓋障菩薩復白佛言世尊如如名以聞慧聞以思慧思身得證不佛言善男子不爾何以故以智慧觀如實法而身得證除蓋障菩薩白佛言世尊不從聞慧聞思慧思身得證耶佛言善男子不也不以聞思慧故身能證得善男子汝今諦聽我當說喻善男子譬如春末盛熱大曠野中有人從東來欲向西有人從西來欲東過從西來者爲熱所逼語彼人言我今爲熱所逼極甚渴乏示我道路何處當有清涼池水可止渴乏東方來人善知途徑善知道相即答彼云道

中有好清涼美水無諸鹹苦我以於彼洗浴飲飽得來至此善男子汝欲趣彼其路衆多去此不遠便有二道一者是左道二者是右道汝今當從右道而往棄其左道去此不久當見叢林鬱茂清涼此叢林中多妙池泉衆

流美味可以洗浴飲除渴乏佛言善男子彼渴乏者聞水思惟時渴已止渴不除蓋障菩薩白佛言不也世尊雖聞清涼而身未證知佛言善男子此亦如是不以聞思慧等便能證知實相之法大曠野者譬如生死渴乏之人是具縛凡夫煩惱熱逼便生愛渴善知道者譬如菩薩善知一切智道能飲水者譬如善得法味洗浴清涼譬如身證澄清淨潔無諸鹹苦譬如實法善男子汝今善聽我更說喻假使如來於閻浮提若壽一劫說須陀味

香氣勝妙甘美清淨食時受樂悉皆讚歎其味無比若使有人雖見其色而未食者已得味不除蓋障菩薩白佛言不也世尊佛言善男子我今爲汝復更說喻譬如有人曾食美果於未得者前讚歎此果色香味具彼人聞說是果時已知彼果色香味不除蓋障菩薩白佛言不也世尊佛言善男子凡夫愚人亦復如是不以聞思中慧便能證知真實法相除蓋障菩薩白佛言世尊今爲我故快說此喻若得聞者不久亦當獲得法利何以故若聞此法必證阿鞞跋致當得阿耨多羅三藐三菩提佛即答言如汝所說聞此法者必證阿鞞跋致當得阿耨多羅三藐三菩提善男子具此十事是名菩薩善知法界

佛說寶雲經卷第四

音釋

卜筮 筮時制切 揲以占也
甚 息淺切 少也
蹇 蹇居偃切 言難也
乙

佛說寶雲經卷第五

身五

梁扶南三藏曼陀羅仙共僧伽婆羅譯

善男子菩薩摩訶薩復有十法名善住空處
何等爲十善知力空善知無畏空善知不共
法空善知戒聚空善知定聚空善知慧聚空
善知解脫聚空身五善知解脫知見聚空善知空
空善知實諦空雖知於空而不取空相不作
空見不依止空不以此空因緣相貌墮於斷
見善男子具此十事是名菩薩善住空處善
男子菩薩摩訶薩復有十法名住無相何等
爲十除外想除內想除戲論想除一切計有
想除一切境界想除一切舉動想除一切趣
向處所想除一切造作想除一切識想除一
切識所緣想除蓋障菩薩白佛言世尊若諸
菩薩已能如是住於無相者佛住無相當復

云何佛即答言如來境界不可思議何以故
非智思量故若欲思者心則狂亂一切衆生
盡共度量不能知於如來此彼岸事何以故
如來境界深遠不可思議猶如虛空出過一
切諸數量表取著見者心常顛倒故非算數
之所思議除蓋障菩薩白佛言世尊欲有疑
問唯願聽許善男子隨汝意問吾今當爲分
別解說一切諸佛亦悉聽許除蓋障菩薩白
佛言世尊若著我所非智人法世尊是大法
主云何當得而自稱譽佛言善哉善哉善男
子諦聽諦聽當爲說之除蓋障菩薩白佛言
唯然世尊諸佛如來不以憍慢而自稱譽不
爲利養不爲名聞不爲使他知不虛妄自稱
不諂曲欺僞何以故但爲利益一切衆生令
得安樂修行法故何以故欲令衆生於如來

所深信敬心甚歡喜堪爲法器者使長夜安隱獲得善利常受快樂乃至得阿耨多羅三藐三菩提除蓋障菩薩白佛言世尊衆生豈不知如來是天中尊自在法王佛言善男子不知何以故下劣衆生業行卑漏少智少

身五

二

信常爲不善諸惡所持不知如來有大威德爲如此等是以如來自稱實德令彼衆生信受修行善男子譬如醫師善知醫法醫所住處多諸病苦更無餘醫能療治者是諸人等不知此醫有大威德是時良醫觀諸病者不識方藥亦復不知所不應食爾時良醫起大慈悲我當療治除其病苦爾時良醫於衆人前自歎已德而作是言我善知是病及知病因善知藥病隨應而授爾時衆生於良醫所心生信敬以信心故便即依憑爾時良醫以

若干種藥隨授而與諸人服已病悉除愈善男子爾時彼醫是自稱譽不除蓋障菩薩白佛言不也世尊佛言善男子如來世尊如大醫王能治衆生煩惱之病亦知煩惱所因起處以大法藥而普與之衆生愚癡爲煩惱所覆不知如來是大醫王如來處處於衆生前常自歎說爾時衆生便生信敬歸依如來聖主世尊猶如醫王以大法藥能滅衆生煩惱之病云何名爲是大法藥貪欲者以不淨治瞋患者以慈心治愚癡者以因緣法治如是等無量法藥身五悉能退治諸煩惱病善男子如來見有如是無量利故而自讚歎善男子具此十事是名菩薩住於無相善男子菩薩摩訶薩復有十法名爲無願何等爲十雖行布施不依布施而有願求雖持禁戒亦不依禁

三

戒而有願求忍辱精進禪定智慧亦復如是
雖依三界而不願求三界相雖求菩提而不
取菩提相雖行正道而不取正道相雖求涅槃
而不取涅槃相何以故菩薩離一切願求
相故雖行一切佛法而心常無所願求善男
子具此十事是名菩薩無願善男子菩薩摩訶
薩復有十法名修慈無量何等爲十不作
方所慈不隨所親慈常行法慈依定修慈不
爲離瞋修慈恒爲利益一切衆生而起於慈
常爲衆生修等之慈不爲離惱害修慈遍於
十方普皆修慈出世間修慈善男子具此十
事是名菩薩修慈無量善男子菩薩摩訶薩
復有十法名悲無量何等爲十見衆生無依
無救無怙爲苦所惱菩薩爾時即發菩提心
得如法修行獲得法已利益衆生於貪衆生

教令布施破戒衆生教修持戒惱害衆生教
修忍辱懈怠衆生教修精進亂心衆生教修
禪定愚癡衆生教修智慧若見剛強諸惡衆
生不受教者而菩薩心亦不退沒雖爲衆生
久受諸苦志必濟彼無有疲厭善男子具此
十事是名菩薩修悲無量善男子菩薩摩訶
薩復有十法名喜無量何等爲十見諸衆生
於生死熾然得離三有虛偽之生而生歡喜
斷絕生死震動來往結業之索生歡喜心見
生死海中魔竭惡覺水羅刹難令得遠離生
死大海如是衆難生歡喜心傾倒魔幢生歡
喜心以智金剛摧結使山今無塵末生歡喜
心我今自得止息亦令他得止息生歡喜心
我今自於生死長眠境界心得覺悟而諸衆
生爲愛所縛無明所盲亦當令彼悉得覺悟

生歡喜心我今自得解脫離諸惡趣險難之處亦當度脫諸墮惡趣險難之者生歡喜心於生死曠野六趣險路獨行無侶周迴往返不善知道不識方所我今得知正道識於方所生歡喜心我今得近一切智城隣於佛坐生歡喜心善男子具此十事是名菩薩喜心無量善男子菩薩摩訶薩復有十法名捨無量何等爲十眼見好色亦無染著入於捨心耳聞聲鼻嗅香舌嘗味身觸細滑意知諸法如是六塵不取其相亦不惱逼常行捨心苦苦行苦壞苦於此三受心無增減而不惱逼常行捨心所作已辦盡諸有結常行捨心菩薩爾時作是思惟我欲度之彼已自度常行捨心善男子具此十事是名菩薩捨心無量善男子菩薩摩訶薩復有十法名遊戲神通

何等爲十現捨天壽現受世生現爲童子種種戲笑現作出家現作苦行現向菩提樹現降魔勞怨現樂寂靜現轉法輪現入涅槃除蓋障菩薩白佛言世尊以何因緣現現率陀捨壽乃至現入涅槃佛答言現率陀天染著五欲多生常想見菩薩於一切衆生中最勝不染五欲而身終沒能破衆生常想之病得無常想心不放逸現率陀天多諸放逸不生恭敬信樂之心染著愛欲不受正法長夜嬉戲自恣娛樂是以菩薩爲欲除彼放逸心故示現捨壽爾時衆生見菩薩捨壽皆除放逸生厭離心除放逸故便發阿耨多羅三藐三菩提心菩薩現出母胎多有異相亦令衆生信受其化雖處母胎爲衆說法皆得阿毗跋致疾向阿耨多羅三藐三菩提若有衆生見

菩薩嬰孩時善根得熟菩薩爲此衆生得成熟善根故現處嬰孩若有衆生見菩薩出家善根增長菩薩便爲是等捨家出家若有衆生志著麤弊菩薩現作苦行而成熟之天龍夜叉乾闥婆應見苦行成熟者即爲現之而

使成熟亦爲調伏諸外道等無量衆生長夜發願菩薩疾趣菩提樹我當隨逐爾時菩薩即便現趣菩提樹下是時衆生得阿毗跋致乃至發阿耨多羅三藐三菩提心又爲衆生憍慢貢高自恃勢力菩薩爲欲破彼憍慢心故現坐道場摧伏魔怨令使信伏菩薩爲樂寂靜衆生增長善根故現坐道場菩薩坐道場時能使三千大千世界一切衆聲悉皆不現三千大千世界即便寂靜令樂寂靜者生希有想皆發阿耨多羅三藐三菩提心能令

衆生悉得寂靜又有衆生自謂大師作一切智想不知出要道不識出世法亦不知現生後報爲欲摧伏如此衆生故見堪任法器成熟衆生爲是等故現成無上三菩提道詣波羅柰三轉四諦法輪又有衆生應現涅槃而成熟者爲欲成熟彼衆生故現入涅槃菩薩以如是緣如是義故現坐道場乃至現入涅槃善男子具此十事是名菩薩遊戲神通善男子菩薩摩訶薩復有十法名離八難何等爲十離惡業不善如來所制禁戒終不毀犯除於貪嫉於過去佛所種諸善根恒修福業智慧具足善知方便善知發願多歡惡心能勤精進菩薩不造惡業而入地獄雖處地獄終不受於地獄苦報所不喜者亦不能惱雖墮地獄而不久處亦復不生惱害之心菩薩

志性調柔恒修十善以十善故不墮地獄菩薩不毀佛戒墮畜生中雖現畜生而不受於畜生之苦菩薩不起貪嫉墮餓鬼中雖現餓鬼而不受於餓鬼之苦菩薩終不生邪見家雖生邪見處必遇善知識何以故已於過去

身五

七

修諸善故亦於過去佛久植善根故常生正見家具善因緣具善因緣故功德增廣菩薩終不諸根毀缺若根減少不任法器菩薩積德久遠修福不倦於諸形像塔寺及法僧中處處修福心常不懈以常修故諸根具足無有闕少堪爲法器菩薩終不生邊地愚騃聲瘖諸惡之處譬如白羊愚癡無智而不能識善惡義趣不任法器亦復不識沙門婆羅門菩薩生於中國聰慧利根有大知見又心信樂親近有智而於善惡善知分別堪爲法器

深信沙門婆羅門何以故菩薩本修智慧力故菩薩不生長壽夭若生長壽夭不覩佛出世遠離道果不能成熟衆生是故菩薩生於欲界佛出世時必當遭遇能化衆生以何因緣善方便故菩薩終不生於無佛世界亦不生於不聞法處乃至不生無衆僧可供養處菩薩生處必遇三寶何以故本誓願力故菩薩生處必有厭惡心不憍慢而自貢高若聞八難諸惡之處必生厭離心不喜樂勤修精進具諸善法除滅惡法善男子具此十法故名菩薩離於八難善男子菩薩摩訶薩復有十法名不怠失菩提之心何等爲十心無諂僞亦無幻惑心常結實澄淨清白於佛法僧終不生疑受持佛法者亦不生疑不生師想而悋於法除却法慳終不作滅佛法因緣言

行相應終不虛妄受持大乘若見受持者常能恭敬於摩訶衍以漸深入於說法者生於佛想生善知識想善男子具此十事是名菩薩常不忘失菩提之心善男子菩薩復有十法能識宿命何等爲十曾多恭敬供養諸佛受持諸佛法能淨持戒除諸疑悔除諸蓋障多歡喜心樂於禪定常受化生得不忘識供養佛者恒於正法常生恭敬受持正法者亦常恭敬以是因緣能受持法讀誦書寫廣爲人說不惜身命專爲正法淨修戒行身口意業悉皆清淨以戒清淨故心無疑悔淨持戒故無有蓋障無有蓋障故心得歡喜心得歡喜故得修禪定得修禪定故生處清淨生處清淨故便得化生得化生故得不忘識得不忘識故便得宿命得宿命故能知一身二身

身五

八

乃至知百千身善男子具此十事是名菩薩得宿命智善男子菩薩復有十法得不離善知識何等爲十得不離值佛若聞佛若憶佛得不離常聞法得不離常供養僧得不離諸佛菩薩禮拜問訊恭敬合掌供養等得不離多聞人值說法人得不離聞諸波羅蜜得不離聞諸道品覺意之法得不離聞三解脫門得不離聞四梵堂得不離聞一切種智善男子具此十事是名菩薩得不離善知識善男子菩薩復有十法得遠離惡知識何等爲十遠離破戒惡知識遠離破正見者遠離壞威儀者遠離邪命者遠離樂世俗言說多慣鬧者遠離多懈怠者遠離樂著生死者遠離背菩提者遠離在家之衆遠離一切結使菩薩雖樂遠離如是等事終不生惱害亦不生輕

身五

九

毀之心菩薩作如是念我曾聞佛說衆生性
欲相染以習近故多有所壞是故我應一切
遠離善男子具此十事是名菩薩遠離惡知
識善男子菩薩復有十法得如來法身何等
爲十等身清淨身無盡身久習善身法身非
算數籌量甚深之身不思議身寂滅身虛空
身智身善男子具此十事是名菩薩得如來
法身除蓋障菩薩白佛言世尊菩薩何時當
得如來法身佛答言善男子初地菩薩得等
身何以故初地菩薩除一切惡身與諸菩薩
同是名等身二地菩薩得清淨身以持戒清
淨故三地菩薩得無盡身以除瞋惱害故四
地菩薩得久積一切善身以修習一切佛法
故五地菩薩得於法身以禪定力知一切佛
法故六地菩薩非世間算數籌量所不能知

身以深遠故七地菩薩得不思議身以善方
便故八地菩薩得寂滅身善除調戲盡一切
煩惱故九地菩薩得虛空身得無礙身遍虛
空故十地菩薩得妙智身何以故遍知一切
菩薩諸地法故除蓋障菩薩白佛言世尊菩
薩法身如來法身無差別耶佛言身無差別
但功德有異除蓋障菩薩白佛言世尊云何
身無差別功德有異佛言身名無異何以故
身一相故而功德相各有差別云何身中別
見功德相佛言善男子我今爲汝說喻以釋
此義譬如摩尼珠皆同名摩尼此珠名雖是
一若瑩磨治飾光則明顯心意悅樂譬如來
身不瑩治者猶如菩薩身如來身摩尼寶菩
薩身摩尼寶如寶無異然如來摩尼寶菩薩
摩尼寶然其光明色相各異何以故如來身

摩尼寶無量滿足衆生界滿虛空界清淨離一切塵垢菩薩身摩尼寶有限不能滿虛空界何以故有垢障故善男子譬如月初至十五日名盛滿月後十五日亦名爲月乃至月盡皆名爲月月雖名同而明不如十五日月盛然月法爾而如來身菩薩之身俱名爲身如月名同如實亦同然光明照耀菩薩如來而各不同菩薩之身光明照耀不及如來其光熾盛譬如月末時月月初之月不可相比善男子以是故如來身菩薩身二身雖同功德有別善男子菩薩復有十法名金剛不壞身何等爲十貪欲瞋恚愚癡不能壞惱害惱慢著我自恃見顛倒不能壞世八法不能壞惡道不能壞一切苦不能壞生老病死憂悲苦惱不能壞一切外道異見不能壞一切魔

天及魔眷屬不能壞一切聲聞辟支佛不能壞一切欲界不能壞善男子具此十事是名菩薩金剛不壞身善男子菩薩復有十法名大商主何等爲十能使商人隨順言教能使商人供養恭敬能作引導不畏諸難能使衆人作依憑處能令人依常得活命豐饒資糧多諸珍寶心不止足常爲前導得至一切種智大城善男子云何名菩薩能使商人隨順言教譬如商主善導衆商若有所說皆悉隨從菩薩亦爾善化衆生能令一切悉皆隨順譬如商主爲諸商人恭敬供養菩薩商主亦復如是學無學人天龍鬼神乾闥婆阿脩羅迦樓羅人非人等亦皆悉來恭敬供養譬如商主善於曠野賊難之處能令衆伴安隱得過菩薩商主亦復如是於生死曠野煩惱賊

處能將諸人安隱得過譬如商主能將諸人出於曠野令濟身命菩薩亦復如是令諸外道鉢羅婆殖尼乾陀等於生死曠野將導使出濟其軀命或有王者大臣官屬及餘衆生樂生死者亦依菩薩大商主故悉得全濟如

大商主善備資糧所須珍寶能將人衆過於險道過險道已便得安隱乃到大城菩薩商主亦復如是欲至佛所多共衆伴經歷生死險遠曠野到彼岸城當修功德以自莊嚴禪定解脫悉令具足菩薩商主欲至一切種智大城具一切佛法功德珍寶譬如商主集諸珍寶無有止足菩薩亦爾集法財寶無有厭足譬如商主善導衆商聰慧最上財產巨富所有言說衆悉奉用菩薩商主亦復如是爲衆導首功德無量於法自在所言無二善能

將導超過險路至彼大城菩薩商主亦復如是將諸衆生超生死險能到涅槃種智大城善男子具此十事是名菩薩名大商主善男子菩薩復有十法名善知道何等爲十知於平道知險惡處知安隱道知不安隱處知諸歧道知諸道處知止住處所知於道相知道曲直知道出要善男子具此十事是名菩薩善知於道善男子菩薩復有十法知道不顛倒何等爲十應示大乘道得度者即示大乘道不示聲聞道應示聲聞道得度者即示聲聞道不示大乘道應示一切種智道得度者即示一切種智道不示聲聞道應示緣覺道得度者即示緣覺道不示一切種智道著我見衆生不爲說空無我不著我見者不爲說苦空無常無我著二邊者不爲說中道著中

道者不爲說二邊失心狂亂者不爲說奢摩他毗婆奢那著邪道者爲說正道令離結使棘刺之屬善男子具此十事是名菩薩不顛倒道善男子菩薩復有十法名爲常在禪定何等爲十觀身身念處觀受受念處觀心心念處觀法法念處阿練若處攝心而行觀於五欲攝心而行於村里營舍城邑聚落國土方所攝心而行於名聞利養攝心而行於如來所制禁戒攝心而行於諸煩惱起瞋恚處及心諂曲攝心而行云何觀身念處攝心而行以正智慧選擇諸惡除去不善從足至頂乃至腦膜觀察諸分無我我所念念不住是敗壞法筋脉所纏臭穢可惡純集惡色如是觀察橫生身想我所之想以是因緣以是相貌諦觀身相心得自在云何觀受念處菩薩

作是念觀察一切諸受悉皆是苦凡夫愚人倒生樂想愚癡無智無識苦樂賢聖之人悉觀是苦勤修方便斷除是苦亦教餘衆生如是觀受不憎不愛斷於諸受云何觀心意止觀心無常而作常想苦作樂想無我我想不淨淨想心甚獼猴如風動搖念念不住速疾變異是結使根本惡道之原常生諂曲爲煩惱主亦是貪欲瞋恚愚癡因緣是一切法宗主工匠心爲前導心從緣起悉知諸法心如畫師畫一切像而心不知心集諸業善惡所由心如循環如旋火輪心如火種然三有新心能生物猶如大水觀察之者當知心相是大患本不令是心而得自在若能於心得自在者於一切法亦得自在云何觀法念處不善之法如實而知貪欲瞋恚愚癡及所依起

一切惡法能修對治貪瞋癡等斷除不善觀
諸善法心樂隨順繫心專念順行諸善亦教
他人同已所觀云何觀於五欲攝心修行於
五欲中不生喜樂亦不憎惡於色聲香味觸
亦不生愛亦不憎惡於此無體相法生憎愛

身五

十四

心便同愚癡凡夫嬰孩不善之者又世尊說
若於法生愛樂亦生染著若生染著便成愚
癡若生愚癡便是不識善惡以是因緣墮於
惡道是故於此空法不應憎惡若憎惡者名
不堪忍若不堪忍則增長恚心為阿耨梨之
所訶責亦為同梵行者之所譏嫌如是觀察
五欲修行正念心不染著亦不憎惡亦教他
人作如是觀云何名阿練若處攝心離亂如
法修行名阿練若處名為無諍住處亦名寂
滅住處此阿練若處有諸天龍鬼神他心智

者善見我心是故我今不應起不善思覺斷
除不善覺勤修善覺當令善覺常得增廣云
何菩薩於里巷村營城邑聚落國土方所是
中行住坐卧於不善處於出家所不應行處
悉皆遠離何處不應行處酤酒家婬女家王
家基博之處醉客之處歌舞妓樂之處如是
種種非是出家所應到處悉皆不往如是村
邑聚落之處攝心而行云何於名聞利養攝
心而行於得利養處欲使檀越增長福業不
為貪著所得財利不作已想與一切苦惱眾
生悉皆共之以是施因緣得名稱讚歎雖得
名稱讚歎而不自舉不生憍慢亦不放逸如
是名稱讚歎不久自滅誰有智者於無常迅
速不住之法不可保信云何於中生於愛憎
何有智者生已有想生憍逸心是名菩薩於

身五

十五

名聞利養攝心而行云何菩薩於如來所制
禁戒常念修行過去諸佛履行禁戒而得成
佛乃至涅槃未來諸佛亦履行禁戒而得成
佛乃至涅槃現在諸佛履行禁戒而得成佛
乃至涅槃作是觀察能持禁戒終不毀犯是
名善修是名善持云何菩薩於煩惱諸塵垢
蓋障能善修習攝心而行菩薩善知煩惱結
使塵垢蓋障善知其因善知所因起處從是
因出菩薩於結使蓋障常念攝心如是修行
善男子具此十事是名菩薩常在禪定善男
子菩薩復有十法名為糞掃衣何等爲十以
能受持終不毀壞心常卑下而不疲厭不以
此事而得解脫不見其過見功德利不自高
已不多聚積善持禁戒諸天親近云何受持
能不毀壞菩薩有信敬心體性具足於如來

所深生信敬寧捨身命不捨所受所受不動
以所受堅固心能卑下以卑下故不生我慢
以意卑下故便於惡賤糞掃之物取已淨洗
洗已縫染心不疲厭不疲厭故常取糞掃衣
亦不以小行而懷自足方進求上法必獲前
利亦不見此糞掃衣過我常著糞掃衣乃至
令老不以此衣而爲羸弊亦不作念此衣羸
弊多有蚤虱若常作者令身垢汗當念思惟
著糞掃衣有諸功德賢聖所服遠離欲者之
所修行是名聖種諸佛所讚如來所譽以是
十五
因緣故不自稱譽不應自高亦不下他是名
戒具足戒具足故諸天親近諸佛讚歎菩薩
守護善能觀察人非人等利利婆羅門聚落
邑主恭敬禮拜同梵行者之所讚歎善男子
具此十事是名菩薩糞掃衣除蓋障菩薩白

佛言世尊菩薩大志何緣樂此下劣麤弊佛
答言善男子菩薩爲護衆生德力所能非諸
凡愚下劣所堪爲未生煩惱作障礙故佛語
除蓋障菩薩善男子汝謂如來爲是大志是
名小乎除蓋障菩薩白佛言世尊我無此辯
當何能答何以故無有能知如來量者現見
如來知一切法受糞掃衣者能制結使不見
如來有所遮制此四天下天人龍鬼皆有卑
下之志如來雖現卑下但爲成熟彼衆生故
於諸衆生前讚歎頭陀汝今當知如是因緣
除蓋障菩薩白佛言世尊爲成熟衆生及新
學者菩薩遮斷結使故說此事善男子威德
力菩薩爲化衆生現受糞掃衣非志卑陋以
是義故菩薩受糞掃衣善男子菩薩復有十
法名受取三衣何等爲十少欲知足不多貪

佛說寶雲經卷第六

身六

梁扶南三藏曼陀羅仙共僧伽婆羅譯

善男子復有十法名菩薩具旃衣何等爲十
不隨染欲名爲旃衣不隨瞋故名爲旃衣不
隨癡故名爲旃衣不隨惱害故名爲旃衣不
隨貪嫉故名爲旃衣不隨憍慢吾我故名爲
旃衣不爲人知故名爲旃衣不爲名聞利養
故名爲旃衣不使魔得自在故名爲旃衣心
不高下故名爲旃衣善男子具此十事是名
菩薩旃衣善男子菩薩復有十法名爲乞食
何等爲十爲益衆生令得福故是以乞食次
第乞食好惡隨時不生悔恨少欲知足乞食
得已與人共同於食好惡不生增減不生貧
著於食知量趣向於善修習善根離諸取著
云何乞食爲益衆生菩薩乞食見諸衆生善

根少受乞食法爲利益衆生故若城邑聚
落到中乞食繫念不捨威儀具足若顧視時
終不輕躁舉動安詳諸根寂定諦視目前不
過一尋於佛法僧深生信敬然後乞食次第
乞食心無選擇刹利婆羅門富貴之家一向
次第食足便止除惡狗新生犢母先破禁戒
墮畜生中若男若女童男童女諸能擾惱者
皆悉不往可譏嫌處亦皆不往次第乞食不
得生著不得生瞋於諸衆生不起憎愛於好
於惡其心正等少欲知足隨得多少還至僧
坊安置衣鉢至洗足處若到佛像塔事衆僧
所恭敬供養乞食之食分作四分一分與同
梵行者第二分與窮下乞食之者第三分與
諸鬼神第四分自供身食我今食者但念修
道不應於食而起染著亦不憍逸貪嗜無厭

作如是食爲存此身濟其軀命是故於食趣得安身不使羸乏亦不令肥何以故若身羸瘦妨廢行道若食厚重復多睡眠爲行道故於食知節不多不少勤修精進除去懈怠爲滿菩提覺支滿菩提覺支故我見得滅我見

身六

二

滅故能以身肉施於衆生善男子具此十事是名菩薩乞食法善男子菩薩復有十法名爲一處坐何等爲十於菩提樹一坐道場降伏魔冤皆悉驚怖此處不動得出世定此處不動得世間慧此處不動得出世間智此處不動得空三昧此處不動得覺一切法此處不動得八正道此處不動得於真實此處不動得於如實此處不動得一切種智座善男子一坐者即是法座菩薩不動搖故名爲一坐善男子具此十事是名菩薩一坐法善男

子菩薩復有十法名一受食何等爲十不貪食不染著食以言食足一切不受酥油黑石蜜阿摩勒汁甘蔗汁及諸果汁時非時都不飲食見他飲食而不生惱常一受食菩薩設有患苦若爲命難善法之難當爾之時不生疑悔作藥想服善男子具此十事是名菩薩一受食法善男子菩薩復有十法名爲阿練若處何等爲十久習梵行善解毗尼諸根具足具足多聞廣博多智除去我見譬如麀鹿不肥不瘦心常默惡樂處閑靜阿練若處云何久修梵行善男子菩薩摩訶薩於佛法中出家學道三業清淨淨持禁戒善知諸法善知威儀行止之處來去坐卧盡依法律於如來法中上中下座教戒威儀能教禪法如此之法已自體解不從他受知義知出要知坐

身六

三

知出罪避諸毀犯精勤修戒少有所犯譏訶
懺悔隨所犯處及以不犯悉能了知若犯重
事乃至中下悉能分別受報輕重近遠諸根
具足依阿練若處所依之處不爲他惱常樂
乞食往返不近不遠近清淨水不汙不濁多
諸林樹無恐怖處華果具足遠離惡獸多諸
龕窟往返不離寂靜第一菩薩如此處晝誦
三遍夜亦三遍聲不高下善守諸根心不散
亂深信歡喜能憶偈句善取因相除去睡眠
王若王等若諸王子婆羅門刹利及餘人民
往至菩薩阿練若處比丘唱言善來大王可
坐此處彼若坐時菩薩共坐彼若不坐菩薩
不坐彼王根若不定應當讚歎大王善得大
利王之國界多諸持戒沙門婆羅門住王界
中不爲惡人盜賊之所惱害王若刹利根柔和

善順堪爲法器當爲種種說法若不樂種種
說法當爲說五欲無常令知厭惡若不樂厭
惡當復爲說諸佛有大慈悲威德自在之所
行處刹利婆羅門邑主長者及以國人隨宜
爲法如是多聞堪法器者即便爲說種種之
法聞已信受心生悅樂皆令歡喜多聞廣博
故無煩惱起善修對治能除我見故不生怖
畏智辯具足故無大衆畏勇猛無難具如是
事能得阿練若處安止而住繫心厭惡樂獨
靜處猶如野鹿常在山林阿練若比丘不如
野鹿恒懷驚怖譬如野鹿見人避走以畏死
故菩薩摩訶薩亦復如是於憤鬧處一切男
女悉皆遠離何以故令我心亂遠離定故不
得厭惡修於功德復樂寂靜我今不應染近
憤亂令失定心住阿練若處善男子具此十

事是名菩薩阿練若處善男子菩薩復有十法名樹下止處何等爲十不近聚落依止樹木而住不近於饒棘刺處依止而住不近摩樓陀蘭草之處依止而住不依枯葉處住不依猿猴處住不依鳥巢窟處住不依惡獸處住不依盜賊危難處住菩薩所依止處無諸恐怖令心悅樂善男子具此十事是名菩薩樹下止處善男子菩薩復有十法名爲露地坐何等爲十春夏秋冬夏不依牆壁住亦不依樹下住不依莎草積住不依山崦處住不依河岸住不作障寒具不作障風具不作遮雨具不作遮熱具不作障露具菩薩在於露地而身有病形體羸弱應至僧坊便作是念如來爲遮諸結使故說於頭陀我今雖在僧坊當斷除結使我今雖在僧坊中不生貪著心

我不爲已身但爲僧坊檀越成諸功德故常作露地想具此十事是名菩薩露地而坐善男子菩薩復有十法名塚間坐何等爲十隨所住處多獸惡心常修死想噉殘想血塗想青瘀想胖脹想燒煎想解散想骨想塚間坐者常修慈心生利益想憐愍衆生淨持禁戒威儀不闕終不食肉何以故不遠塚間有諸非人及惡鬼神以食肉故心皆厭賤無喜見者常作惱害塚間比丘往至僧坊先禮佛塔却禮上座與諸下座談論語說立住而去不坐僧祇氈褥何以故爲護惜僧物故如凡夫愚人鄙賤塚間設若有人施於牀敷請命使坐問言爲是汝已有爲是僧有觀前人意不生悔心然後始坐心生下劣如旃陀羅子善男子見此十事是名菩薩塚間坐法善男子

菩薩復有十法名常坐不卧何等爲十不爲苦身故常坐不爲苦心故常坐不爲止睡故常坐不爲疲極故常坐爲滿足菩提故常坐欲使心專一故常坐欲使向正道故常坐欲坐道場爲得菩提故常坐欲利益衆生故常

坐爲斷一切結使故常坐善男子具此十事是名菩薩常坐不卧善男子菩薩復有十法名爲隨敷坐何等爲十不貪著敷故隨敷而坐不自安敷亦不使他敷不作形相使他敷敷若草若枯樹枝葉墮在上坐若有蠅子蚊蝻蠅蚤毒蠍之處即時捨去不住於中若欲卧時右脇而卧足足相疊善斂衣服不令解服若睡眠時常繫心明相作必起意不著睡眠以爲喜樂右脇卧時若有疲極終不更轉左脇而卧爲調和四大常不離善男子具此

十事是名爲菩薩隨敷而坐法善男子菩薩復有十法名成就禪何等爲十多修不淨觀多修慈心多修十二因緣多修離過患法多修於空多修無相多修習禪多修不悔恨持戒完具善男子云何多修不淨觀菩薩獨處閑靜默然攝意厭惡現前正身端坐支節完具深心喜悅結跏趺坐作是思惟如人飲食美味好漿及餘麤澀是諸美味及不美味皆依此身變成不淨膿血臭穢悉皆可惡一切衆生貪嗜美味心恒樂著我今當願依佛正法如實之相觀察此身不可染著亦不厭離速求涅槃是名菩薩多觀不淨云何菩薩多修慈心如上漆處端身獨坐寂靜思惟衆生多有瞋恚便生惱害作諸不善若有衆生與我等者云何來世自生怨恨如是衆生我當

方便斷其瞋恚作如是念深心思惟不但口說云何菩薩多修十二因緣衆生多起貪欲瞋恚有如是等皆因緣生假使餘法一切皆從因緣而起云何智者見如是相一刹那頃從因緣法皆悉是空不應爲此而自毀害云

身六

七

何菩薩多修離過患法若自生過尋能除斷見他過患深入捨心云何尋自除患患者於諸佛不生信敬心於法僧所亦不生信敬心於戒不生信敬心於和尚阿闍黎時類宿舊有智者邊上中下座亦不生信敬心自高已身卑下他人於五欲所心樂趣向背捨涅槃我見衆生見壽者見人者見計有虛空起於斷見深著有想起於常見於賢聖所背捨遠離親近凡愚遠離持戒者親近破戒者近惡知識遠離善知識誹謗經法常生不信聞諸

深義心生驚畏懈怠懶惰於修法所輕而不爲意志下劣無有言辯應不疑處返生疑惑於可疑處而不生疑爲五蓋所覆幻惑諂僞睡眠所覆貪著利養世間名稱愛樂種性侍於居業愛著徒衆遠離正法樂俗談話捨離禪思見善不欣聞惡貪樂而心不肯親近出家但念親近年少婦女童男童女不喜阿練若處食不知量不親近有智師友善人不知誦習經行時節亦不知所應行來往返之處於微細戒而作輕心輕於小惡視瞻不端舉動輕躁恒作非法言語麤獷於好惡色心皆貪著好喜瞋恚不修慈心於苦衆生不生憐愍見病苦者亦不厭惡聞死不驚常處熾然不求出要不觀察身不守禁戒不觀己身可作不可作可覺不覺可思不思非道爲道道

爲非道未得謂得若少營福便多封著而心錯亂於大功德終不修行謗毀摩訶衍誹謗聲聞誹謗樂大乘者誹謗樂小乘者亦生誹謗譏訶於戒爲戒闕諍爲人剛強言常麤惡而自貢高無懷慚色不知羞猒躁惡麤弊言辭不遜好喜綺語常行惡口多諸妄語調戲無度有如是等過爲離此過患法離一切調戲修習空定多修空故處處觀察體性悉空能觀空智此亦是空作是觀已繫心無相觀內外法不得身相亦不得繫念相爾時不見繫心於身亦不得身相亦不得外相亦不得念外相去除外相身相亦除除斷內相心樂善法修道增廣次第不斷常念定慧修功德本正觀諸法如實深義是名爲慧善攝亂意歡喜無悔是名爲定何以故淨持戒故菩薩

能淨持戒必成就禪戒具足禪道是故持戒具足名爲修禪善男子具此十事是名菩薩修禪法善男子菩薩復有十法名持修多羅何等爲十爲守護法聞則能持不爲財物飲食故持爲紹三寶種佛法不斷不爲利養故持爲使摩訶衍廣流布故持不爲恭敬利養故持無救衆生爲作救護故持不爲名稱讚歎故持爲苦惱衆生使得樂故持爲令衆生得慧眼故持爲求聲聞者令得聲聞道故持爲修摩訶衍成就摩訶衍故持爲成一切種智故持不爲求下乘故持善男子具此十事是名爲菩薩持修多羅善男子菩薩復有十法名爲律師何等爲十善解毗尼所起因緣善解毗尼甚深之處善解毗尼微細之事善解毗尼此事得彼事不得善解毗尼性重戒

善解毗尼制重戒善解毗尼制起因緣善解
聲聞毗尼善解辟支佛毗尼善解菩薩毗尼
善男子具此十事是名爲菩薩善持律師善
男子菩薩復有十法名善知威儀善知可行
不可行處善知行法善知威儀舉止何等爲
十善學聲聞戒善學辟支佛戒以善學故威
儀具足威儀具足故不可行處終不往彼不
應往方亦不往彼非時不行沙門所行處行
不可行處不行是故威儀具足沙門婆羅門
所譏訶處亦終不往以是故沙門婆羅門無
譏訶者亦能教他修行如是威儀禁戒以是
義故威儀具足寂滅威儀無諂誑威儀善男
子具此十事是名菩薩威儀進止所行具足
善男子菩薩復有十法名除嫉妬何等爲十
自行布施亦教他人行布施讚歎布施法見

他布施心生隨喜爲說法要讚歎彼人令使
歡喜終不生念但施於我莫施於彼願一切
衆生皆得施利所須具足皆得快樂得世間
利樂得出世利樂我今勤爲衆生修無上道
爲欲利益故云何當起嫉妬之心善男子具
此十事是名菩薩能除嫉妬善男子菩薩復
有十法能爲衆生起平等心何等爲十爲一
切衆生作修福因緣令一切衆生心無嫌恨
不使一切衆生起於瞋忿爲一切衆生故布
施持戒忍辱精進禪定智慧爲一切衆生故
發一切種智心爲一切衆生故自滿一切種
智心皆不生二想所作功德與一切衆生悉
皆共之緣一切衆生以爲境界如是思惟時
能速成就菩薩之法速成就菩薩法故能觀
生死如火熾然自乘此法能出生死亦使衆

生得濟苦海皆起等心不生增減善男子譬如長者唯有六子其心愛著於諸子中悉皆平等爲設方便然諸子等幼小無智不能行來不識善惡其家火起是諸小兒各在異處善男子而此長者寧可作心此子應出彼不應出此子先出彼應後出除蓋障菩薩白佛言不也世尊何以故是長者等心於子無差別故善男子菩薩亦復如是於諸衆生心皆如子愚小無智於生死摩竭熾然世界是諸子等各處小道菩薩隨應成熟皆悉拔濟咸令得出置寂滅處善男子具此十事是名菩薩於一切衆生起平等心善男子菩薩復有十法名善供養佛何等爲十以法供養於佛以救拔濟衆生供養於佛以教化衆生令立諸善供養於佛常與一切衆生利供養於佛

不捨願行供養於佛不捨菩薩所行供養於佛言行相應供養於佛心無疲厭供養於佛不捨菩提供養於佛不以財施供養於佛何以故善男子如來法身不待財施供養唯以法施供養爲上以具足供養利益衆生令得安樂常獲善利善男子若不能利益衆生放捨善法所作疲厭好喜妄語志意下劣心生疲倦離菩提心有如是等不能爲諸衆生而作利益何以故菩薩要依衆生修諸功德乃至成阿耨多羅三藐三菩提若無衆生終不能成阿耨多羅三藐三菩提無上正覺爲具佛道以法供養爲最第一不以財施爲真供養善男子具此十事是名菩薩能善供養佛善男子菩薩復有十法名摧伏憍慢何等爲十菩薩或時出家作是思惟父母眷屬已捨

出家猶如被棄壞爛死屍云何於中當起憍慢我今剝除鬚髮毀形尚道節身知足著壞色衣改先所好修出家法捨俗威儀云何當起憍慢之心剃頭持鉢而行乞食作乞句想不應憍慢當自卑下如旃陀羅子我今乞句由他濟命云何憍慢而自毀傷是故思惟摧伏憍慢我今受乞食法爲他所賤人與食時如似捨棄如是思惟云何憍慢我今於一切衆生恒如和尚阿闍黎相應加謙敬摧伏憍慢我與諸同學同梵行者善護威儀常念順行不應到於非律儀處當使諸同梵行者見我歡喜如此思惟時摧伏憍慢我未曾得修行佛法今得修行於瞋恚惱害衆生中當念忍辱如是思惟時摧伏憍慢善男子具此十事是名菩薩摧伏憍慢善男子菩薩復有十

法名爲信敬何等爲十善根深厚宿殖德本得於正見不隨他信不歸依他志性恒正不爲虛妄其心質直無有諂曲利根智慧功德具足除諸陰蓋其心清淨常依善知識遠離惡知識摧伏諸憍慢聞深妙法能善諦受終不顛倒妄解如來甚深法藏威德自在善男子具此十事是名菩薩能多信敬爾時除蓋障菩薩白佛言世尊我今於如來大威德所願說少法令我得聞善男子汝今善聽當爲說之如來要法威德少分善哉世尊願爲演說佛言如來大慈等與一切衆生樂若於一切衆生起慈心時乃至十方衆生亦復如是遍一切衆生界亦滿虛空界無能遍知如來甚深境界邊際如來有大悲心不與聲聞辟支佛共如來於一衆生起於悲心

乃至一切衆生亦復如是爲作利益如來大悲無有邊際非諸二乘所能究竟善男子如來說法不可窮盡能於一時普爲十方衆生說法若一劫百千萬億劫無量阿僧祇劫作如是說一切衆生無有能知如來說法邊際

身六

十三

男子如來天眼所見境界無量無邊非肉眼所見是天眼境界如來於一念中悉皆見之如觀掌中阿摩勒果如來天耳所聞境界無量無邊如上天眼一切衆生異類音聲隨其大小於一念頃悉分別知如來復有無量無邊無礙智慧無與等者不可爲譬一切衆生若心念所知隨其根性種種差別如來於一剎那頃悉分別知隨彼衆生各各所念各各所作隨造善惡所得業報如來能以三達無礙智慧於剎那頃悉分別知善男子如來常在禪定何以故如來終無妄念如來諸根無有錯謬如來斷一切結使其心寂靜若雜結使其心散亂離清淨法如來已離一切業習塵垢永盡無漏無爲於法自在一切三昧三摩提無量境界已度彼岸如來常在三昧常

一威儀乃至涅槃如來於無量百千億劫修習所得無有衆生能思惟分別知其量者除蓋障菩薩白佛言世尊如來不從阿僧祇劫積集功德耶佛言不爾何以故善男子菩薩不能思議如來境界如來境界不可思量但

身六

十四

爲淺近衆生說三阿僧祇修習所得菩薩而實發心以來不可計數除蓋障菩薩白佛言世尊若衆生久修善根植諸業行除去蓋障多有信解近於阿耨多羅三藐三菩提得聞如來無量威德聞是法已歡喜信樂況復受持讀誦書寫供養爲人廣說如是之人不久亦當得大威德堪任法器佛言如汝所說如是如是如此衆生爲佛所護久種善根親近諸佛聞佛有大威德善男子善女人而於其中不生疑惑善男子善女人心不錯亂不錯

亂故思惟如來有大威德深心殷重信樂之心七日七夜著鮮淨衣恭敬供養專念如來大功德寶心不移易必得見佛若不滿七日乃至一日一夜命終之時亦得見佛除蓋障菩薩白佛言世尊頗有衆生於如來所說不

信受者佛即答言善男子有或有衆生聞佛

所說不肯信受深生惱害於說法者生惡知識想以是因緣身懷命終墮於地獄善男子若聞如來有大威德生世尊想生大師想如此之人已於前世得聞如來無量功德以是

身六

十五

因緣今復續聞即自思惟我等先身必曾從佛聞如此法爾時如來即出廣長舌相自覆其面其舌廣長踰於髮際乃至覆頭覆頭已復覆其身覆身已覆師子座又覆菩薩聲聞緣覺護世四天王梵天帝釋遍覆一切無量

大衆佛還攝舌相告諸大衆善男子等如是舌相無虛妄耶善男子若信是事長夜安隱得諸利樂說是語時八萬四千衆生得無生法忍無量衆生遠塵離垢得法眼淨無量衆生未發菩提心者皆發阿耨多羅三藐三菩提心佛復告除蓋障菩薩善男子菩薩復有十法名滿世間善何等爲十雖說於色而於實諦不見有相亦不著色相受想行識亦復如是雖說於地而於實諦不見有相亦不著地相水火風空識亦復如是雖說於眼而於實諦不見有相亦不著眼相雖說耳鼻舌身意法而於實諦不見有相亦不著意法等相雖說有我而於實諦不見有相亦不著我相衆生壽者命者丈夫夫人而於實諦不見有相亦不取著但世諦假施設有第一義諦則不

可得亦不取著世諦假施設有第一義諦無有體相亦不取著世流布中而有佛法差別若於實諦亦無佛法善惡之相但世諦中而有菩提第一義諦則無菩提亦無取著善男子假施設法名爲世諦終不說世諦爲第一義諦善男子菩薩摩訶薩善於世諦不名爲善於第一義諦善男子具此十事是名菩薩滿世間善善男子菩薩復有十法名爲善說第一義諦何等爲十成就無生法忍成就滅法成就不壞法非造作法是究竟法非處所法無言語法無調戲法身六是寂滅法十六是賢聖法何以故善男子第一義諦不生不滅非壞非所作亦非無作非文字亦非調戲所得善男子第一義諦非言語道法相寂滅賢聖之所證覺善男子第一義諦非壞敗相諸佛出世

及不出世法相常爾以是因緣故菩薩剷除
鬚髮信家非家出家學道正信出家身服袈
裟著壞色衣精勤修道如救頭然捨諸虛妄
志求實法善男子若無實法則虛出家諸佛
如來亦虛出世以是因緣有真實法善男子
具此十事是名菩薩善解第一義諦善男子
菩薩復有十法名為善知十二因緣何等為
十善知體相空善知剎那法善知不堅法善
知如影如水中月如呼聲響善知法如幻善
知法如電善知法如焰如因緣生法此悉是
空一剎那頃不堅法如是乃至因緣生法此
法生亦見生住亦見住異亦見異壞亦見壞
菩薩如是思惟以何因緣生以何因緣滅菩
薩復更思惟因無明故能生諸法無明力故
諸法得出一切諸法無明為導一切諸法依

止無明依無明故能生於行依行故生識識
因緣生名色名色因緣生六入六入因緣生
觸觸因緣生受受因緣故凡愚衆生於受少
分便起染愛受因緣生取取因緣生有有因
緣生生生因緣有老死丈夫夫人老死死因緣
憂悲苦惱衆苦聚集以是因緣生大苦陰以
深智慧慙懃方便當斷無明拔無明根滅於
無明無明相應法一切盡滅譬如命根盡時
諸根都盡無明盡時依無明法一切悉盡無
明滅故諸煩惱滅煩惱滅故生死因皆滅生
死滅故近於涅槃善男子具此十事是名菩
薩善知十二因緣善男子菩薩復有十法名
善知我何等為十菩薩作如是觀察我生誰
家為是婆羅門家為是刹利家為是長者家
為是下賤家菩薩雖生上族家而無憍慢想

若生下賤處而作是念我本曾作不善諸業以惡業故今生下賤家以是因緣多修猷惡多修猷惡故欲得出家既出家已作是思惟我爲何事而求出家夫出家法爲自度脫亦度於彼以是因緣不應懈怠而自懶惰作是思惟我今出家當斷不善若有小惡速疾除斷於諸善法深起愛樂歡喜無猷所未斷惡方便令斷如是復更觀察我等出家云何增廣善法善法增已當倍愛樂深心歡喜善法未增當令增廣我今依怙師僧增廣善法以是因緣於和尚所若持戒者破戒若多聞者少聞若聰明者無智悉皆恭敬生世尊想於諸世尊恭敬供養信樂歡喜於和尚所亦復如是於阿闍黎復生恭敬我依阿闍黎故善法增廣菩提法分未滿足者當令使滿諸結

未斷者當令使斷於阿闍黎復生和尚想供養如前愛樂歡喜增長右法損減左法如是左法不令增長復更觀察誰是我世尊一切種智是我世尊能一切覺能一切說救濟世間憐愍衆生具大悲心是大福田是我世尊天人之師以是因緣以是相貌應生信敬愛樂歡喜又復思惟我得大利遇佛世尊如來制戒我今寧捨身命終不毀犯如來制戒是名善受佛教我今當應從誰受供如我今者當從刹利婆羅門聚落城邑受彼供施令彼果報尊貴富樂我亦不應虛受人供如是刹利婆羅門聚落城邑皆作何想我今思惟有何功德而施飲食刹利婆羅門聚落城邑當念我是沙門作福田想我今應當具滿沙門所行之道比丘功德沙門功德福田淨業宜

稱其名我今處生死中當自拔出我今已得
出家善利我今初得無上大利我得出家即
是無上大利我今能稱出家之法亦是無上
大利我今當勤精進遠離懈怠亦疾速出生
死災患善男子菩薩出家常應執念如是思

身六

十九

惟善男子具此十事是名菩薩善知於我善
男子菩薩復有十法名善知世法何等爲十
於自高人起卑賤想於憍慢人起恭敬想於
諂曲人起質直想於妄語人起真實想於憎
惡人起愛樂想於剛強人起柔軟想於不忍
人起忍辱想於瞋忿人起慈心想於苦惱人
起悲心想於多貪人起施與想善男子具此
十事是名菩薩善知世法善男子菩薩復有
十法名能生淨佛國土何等爲十持戒清淨
無闕戒無嫌戒於一切衆生心常平等同其

事業具諸功德遠離名聞讚歎利養不塗八
法深信不疑勤修精進無有懈怠攝心禪定
無諸錯亂善修多聞遠離無智利根聰慧滅
除癡闇於瞋惱衆生恒修慈心除蓋障菩薩
白佛言世尊若十事不具能生淨土不佛即
答言善男子若能於一事具足無闕當知十
事悉皆清淨以是義故名具足事得生淨土
善男子具此十事是名菩薩能生淨佛國土
善男子菩薩復有十法名胎不塗汙何等爲
十作諸形像如來塔寺若有毀壞嚴飾修治
復以諸香泥塗於佛塔如來形像常以香水
洗浴於如來塔塗掃清淨又於父母所躬自
供養於和尚阿闍黎同梵行者心常恭敬供
養不爲財利以此善根迴與一切衆生願令
皆得胎不塗汙心常殷重如是思惟善男子

佛說寶雲經卷第七

身七

梁扶南三藏曼陀羅仙共僧伽婆羅譯

善男子菩薩復有十法名爲正命何等爲十
心不諂曲不外現相貌而求利養不作抑揚
顯已異衆不外蔽五欲而心求利養不取非
法財不取不清淨財不著利養不滌利養而
常知足於如法利恒生知足云何菩薩心不
諂曲不以利養令身口意諂曲云何身諂曲
菩薩不爲見檀越故現諸威儀云何作威儀
見檀越時低視而行如猫伺鼠是名身諂曲
云何口諂曲菩薩不爲利養作柔輒語作愛
語作庠序語隨他所愛語隨他意語如是等
語皆悉不作云何意諂曲口說知足而心貪
著佛言內燒內熱口言知足心常貪著若不
如是名不諂曲云何名不外現相貌菩薩不

以見檀越時作諸相貌我衣服短少我鉢減
少湯藥卧具減少菩薩不以見檀越故作如
是說云何名不作抑揚顯已異衆菩薩口終
不言彼有檀越與我此物爲憐愍故受我今
持戒清淨具足多聞少欲信心檀越皆樂施
給不作此說者是名不作抑揚顯已異衆云
何名不外蔽五欲而心求利養菩薩終不外
現苦行作五熱炙身拔髮自餓如是等苦而
要財利於他利養不懷憎嫉亦無熱惱是名
不外蔽五欲心求利養云何名不取非法利
養不輕秤小斛欺誑於他受人財物終不侵
欺云何名不取不清淨財若有人施佛法僧
物及僧祇物如是之物取爲已用乃至博貿
販賣出息生利而自入已如是等物名非法
財菩薩摩訶薩遠離如是等物是名清淨活

命菩薩若得利養不生我所想財利歸已亦
不生能得想亦不作積聚守護想常念施與
沙門婆羅門父母師長眷屬貧窮乞匄恒作
是想若須食時當求支命於諸美味心無染
著若不得時亦不憂惱亦不生熱不得令彼
信心檀越生於不信若得如法利養皆與僧
同能如是者佛所印可諸菩薩衆所不譏訶
亦爲諸天常隨讚歎同梵行者心無譏嫌於
利養中常生知足得離邪命善男子具此十
事是名菩薩清淨活命善男子菩薩復有十
法名不疲厭何等爲十常爲衆生久處生死
心無疲厭爲衆生故能受生死於無量苦亦
無疲厭爲聲聞人教修禪法不生疲厭心不
輕賤修行覺意法不生疲厭具菩提法不生
疲厭雖求涅槃而不證涅槃漸深流注至菩

提岸善男子具此十事是名菩薩心不疲厭
善男子菩薩復有十法名隨順佛教何等爲
十不住放逸處除諸放逸善攝其身亦不令
身起諸過惡善攝其口亦不口起諸過惡善
攝其心亦不令使心起諸過惡畏後世苦而
具一切善法修行一切善法而斷一切不善
法說一切善法而毀訾一切惡法毀訾一切
惡業修行一切善業於如來法不說其過消
滅一切諸垢煩惱守護如來所制聖戒善男
子具此十事是名菩薩順如來教善男子菩
薩復有十法名和顏悅色離於顰蹙何等爲
十諸根澄靜諸根清淨諸根不闕諸根離垢
諸根白淨除於惱害除諸結使得不起結使
除嫌隙心遠離瞋恚除蓋障菩薩白佛言世
尊如我解佛所說諸根清淨故得和顏悅色

和顏悅色故離諸結使離諸結使故得不覺
覺佛言善男子如是如是諸根清淨和顏悅
色除諸結使離於羣麁善男子具此十事是
名菩薩和顏悅色離於羣麁善男子菩薩復
有十法名爲多聞何等爲十見生死熾然如
實而知見瞋恚熾然如實而知見無明闇亂
生死熾然如實而知見一切有爲法悉皆無
常如實而知見一切有爲法悉皆是苦如實
而知見世間空如實而知一切法無我如實
而知一切衆生著於調戲如實而知解一切
法從因緣生如實而知寂滅涅槃如實而知
但從聞思慧不取口語如是知已爲衆生故
深發大悲勤加修習具於精進善男子具此
十事是名菩薩修行多聞善男子菩薩復有
十法名持正法何等爲十法欲壞時有五濁

惡起德薄衆生多住邪道智燈欲滅無有導
師能說正法諸大修多羅雖有深義無能說
者亦無讀誦受持之者爾時菩薩見法壞時
能受持經藏讚歎讀誦爲人開示分別解說
其中有人聞已生信心樂歡喜不爲財利但
欲聽法於說法者生世尊想於所聞法生甘
露想作不死想如諸妙藥不惜身命勤求正
法聞已修行善男子具此十事是名菩薩善
能持法善男子菩薩復有十法名法王子何
等爲十以相具嚴身衆好如妙華諸根滿足
無有缺減如來所親近身七法亦能親近如來所
行道亦能順行如來所解法亦能順解成熟
苦惱衆生善修學戒長夜勤行四無量心於
如來所止之城佛亦能住中善男子具此十
事是名菩薩法王之子善男子菩薩復有十

法名出過帝釋護世之法何等爲十於菩提心無有退轉一切衆魔不能動搖於一切佛所種諸善根能入一切甚深法藏於一切法得平等智於佛法中不從他信得清淨智不共聲聞辟支佛法住無生忍出過一切護世之法善男子具此十事是名菩薩出過一切帝釋護世之法善男子菩薩復有十法能知衆生根性內外結使何等爲十若體性貪欲如實能知體性瞋恚如實能知體性愚癡如實能知善知煩惱上中下差體性內外如實能知善知體性如實能知善知堅體性如實能知善知長體性如實能知善知慘惡體性如實能知善知一切衆生亦知一切世界衆生體性善男子具此十事是名菩薩能知衆生根性內外結使善男子菩薩復有十法名

成熟衆生何等爲十應見佛身得度者即現佛身應見菩薩身得度者即現菩薩身應見緣覺身得度者即現緣覺身應見聲聞身得度者即現聲聞身應見帝釋身得度者即現帝釋身應見魔身得度者即現魔身應見梵王身得度者即現梵王身應見婆羅門身得度者即現婆羅門身應見刹利身得度者即現刹利身應見長者身得度者即現長者身如是等身隨其所應悉爲現之善男子具此十事是名菩薩成熟衆生善男子菩薩復有十法名善調順何等爲十質直柔軟無諂曲心無惱害心無垢汙心清淨心無麤獷心除瞋恚心除麤惡語多諸忍辱能止諍論善男子具此十事是名菩薩能善調順善男子菩薩復有十法名安樂共住何等爲十正見清

淨具足修行具足清淨戒具足諸所行處應
出家法起煩惱處不於中住其心調柔於同
梵行者如牛念犢修行平等常樂菩提第一
正道唯佛爲尊不求餘神善男子具此十事
是名菩薩安樂共住善男子菩薩復有十法
名爲攝法何等爲十以施攝衆生以樂攝衆
生無盡施攝衆生利益攝衆生義益攝衆生
說法攝衆生化導攝衆生除衰與利攝衆生
同飲食攝衆生資命所須與衆生共云何施
攝衆生常以法施永濟其苦是名爲施云何
施樂施食令安無飢渴想是名施樂云何無
盡施教修禪定遠離散亂是名無盡施云何
利益施教教授善法增長信心是名利益施云
何義益施教如實法深了空相是名義益施
云何說法施依修多羅隨所應聞終不邪說

是名說法施云何化導施說如實法無錯謬
相是名化導施云何名爲除衰與利施勤減
惡法安置善法是名除衰與利施云何同飲
食施所有飲食悉與衆共是名同飲食施云
何名資命所須施象馬七珍乃至供身衆具
雜物盡與衆共是名資命所須施善男子具
此十事是名菩薩行攝法施善男子菩薩復
有十法名爲端正何等爲十寂滅威儀不詐
僞威儀清淨威儀人見愛敬威儀如月威儀
視不眦足威儀意所悅樂威儀一切樂見威
儀能使一切歡悅威儀能使一切信樂威儀
善男子具此十事是名菩薩端正威儀善男
子菩薩復有十法名可依憑何等爲十能擁
護衆生使離煩惱能令衆生出於生死曠野
險難能使衆生出生死魔端能爲無救衆生

作親友處能爲煩惱病衆生而作良醫無救護者能爲救護無舍宅者爲作舍宅無歸依者爲作歸依無洲渚者爲作洲渚未到者能令作到善男子具此十事是名菩薩常可依憑善男子菩薩復有十法名大藥樹何等爲十譬如藥樹名曰善見若有衆生得樹根者而病除愈有得莖者而病除愈有得枝者而病除愈有得葉者而病除愈有得華者而病除愈有得果者而病除愈有見色者而病除愈有聞香者而病除愈有得味者而病除愈有得觸者而病除愈善男子菩薩摩訶薩亦復如是從初發心爲無量衆生有若干種諸煩惱病有依捨得活有依戒得活有依忍得活有依精進得活有依禪定得活有依智慧得活有見法得活有聲聞得活有知味得活

有同事得活善男子具此十事是名菩薩爲大藥樹善男子菩薩復有十法名勤修福業何等爲十常於三寶隨力供養於病者所施給醫藥於飢渴者隨施飲食見裸寒者施其衣服於和尚阿闍黎常恭敬供養信受言教於同梵行者起迎恭敬禮拜問訊造作園林池井乃至穀帛施於一切及家奴婢僕使內外眷屬亦等施之與持戒沙門婆羅門常念親近往返恭敬善男子具此十事是名菩薩勤修福業善男子菩薩復有十法名爲善能作化何等爲十一佛國身相不動而能遍諸佛刹問答諮請於一佛國不動亦能悉遍一切佛國聽受妙法於一佛國不動能遍供養十方諸佛於一佛國不動而能遍諸佛國莊嚴菩提悉皆滿足於一佛國不動而於一切

佛國初成佛時坐於道場菩提樹下恭敬供養尊重讚歎於一佛國不動能以自身現一切佛土坐於道場現成佛道於一佛土不動能現一切佛土轉於法輪於一佛土不動能現一切佛工入於涅槃於一佛土不動能現一切十方佛土應受化者悉現其身菩薩得無作神力於一切十方佛土不作變化想亦不作變化隨諸衆生所應見者悉皆現之爾時除蓋障菩薩白佛言世尊云何菩薩能作如是變化復言亦不作變化想亦不作變化善男子汝今諦聽我當說喻譬如日月光照四天下利益世間能於衆生常作利安而日月亦不作想我能照諸衆生有大利益然諸衆生悉蒙光照菩薩亦爾以本善業誓願因緣得無作法自然成就故能不作變化想亦

不作變化然於一切有利益處悉見變化善男子具此十事是名菩薩變化善男子菩薩復有十法名速疾成阿耨多羅三藐三菩提何等爲十修行布施令使布施滿足修行持戒不闕戒不譏嫌戒出過聲聞辟支佛戒清淨戒身滿足忍辱滿足精進滿足禪定滿足智慧滿足方便滿足願滿足力滿足智滿足過一切聲聞辟支佛從初地乃至九地菩薩所不能及善男子具此十事是名菩薩速疾得阿耨多羅三藐三菩提說是經時三千大千世界六種震動此三千大千世界中諸須彌山王目真隣陀山摩訶目真隣陀山鐵圍山大鐵圍山寶山黑山如是諸山悉皆曲躬向伽耶山何以故如來自在神通力故三千大千世界中一切華樹一切果樹一切香樹

皆來曲躬向伽耶山何以故如來自在神通力故無量億那由他百千億諸菩薩悉脫身上妙衣及諸瓔珞供養如來神通力故積過須彌若干種衣服瓔珞無量百千億帝釋護世梵天王等合掌頂禮曼陀羅摩訶曼陀羅華散諸佛上曼殊沙華盧之華摩訶盧之華以散佛上百千萬億諸天在虛空中皆散天衣作衆妓樂歡喜踊躍出大音聲各以天華供養於佛而作是言佛更出世再轉法輪衆生有福宿植德本於過去佛所久種善根得聞此經聞之尚難況復信解書寫受持爾時無量百千摩睺羅伽於此演法出大雷音遍三千大千世界以種種香汁雨伽耶山無量百千龍王在於佛前作衆妓樂無量百千乾闥婆緊那羅以柔輦音讚歎供養繞伽耶山

無量百千夜又雨諸蓮華放清涼風無量百千他方諸佛皆出白毫相光供養如來及所應說法出白毫相光作種種色青黃赤白紫玻瓈色繞於三千大千世界除一切閻繞伽耶山從佛頂沒無量百千婆羅門刹利聚落城邑香華瓔珞末香衣服繒蓋幢幡以供養佛說是經時如是等無量供養七十二那由他菩薩得無生法忍無量百千衆生離諸塵垢得法眼淨無量百千億衆生發阿耨多羅三藐三菩提心伽耶山神名爲無死與其眷屬皆從座而起自入宮室取供養具而供養佛供養佛已白佛言世尊我憶往昔七萬二千佛皆在此一伽耶山說是經典文字章句如今不異佛言快得善利汝等得聞如是寶雲經有一天子作如是念是伽耶山神久聞

此經法供養七萬二千佛云何不轉女身除
蓋障菩薩摩訶薩知彼天子心之所念白佛
言世尊以何因緣無死天神有大神德聞是
法寶供養爾所諸佛云何不轉女身佛答言
善男子爲利益衆生故以何因緣爲不可思
議解脫善男子我憶過去於算數佛所見是
無死天神發阿耨多羅三藐三菩提心無死
天神有大威德神通供養賢劫千佛於此國
土當得成佛號曰無死阿羅訶三藐三佛陀
佛告無死今可現汝所成佛國土爾時無死
天神即入現一切色三昧入現一切色三昧
已此三千大千世界地平如掌皆紺瑠璃一
切穢惡諸黑山等悉皆滅沒處處皆見劫鉢
之樹衆寶樹衆香樹處處皆見流泉浴池八
功德水充滿其中一切惡趣下賤之人悉皆

不現國中無有女人之名處處皆有蓮華大
如車輪菩薩而在其上結跏趺坐彼無死佛
在蓮華上坐爲諸菩薩演說法要無量百千
億釋梵四天王等圍繞又有無量百千萬億
衆生悉來供養佛爲說法次第諦聽無死天
神從現一切色三昧起頂禮佛足右繞佛已
即隱不現除蓋障菩薩摩訶薩白佛言世尊
善男子善女人作幾許福得聞是經佛言若
人至心善聽此經憶念受持讀誦書寫廣爲
人說佛言復有善男子善女人於此三千大
千世界百千億劫修行布施不如善男子善
女人信心清淨書寫供養以清淨心故得福
甚多何以故財施微妙法施廣大生死衆生
於生死中作無量財施未曾得聞出世法施
若善男子善女人使三千大千世界衆生皆

立十善復有善男子善女人聞此正法次第受持讀誦廣分別說其福亦過於上何以故十善果報生此世界故若善男子善女人能令三千大千世界衆生悉得須陀洹果斯陀含果阿那含果阿羅漢果得辟支佛果設得如是功德猶故不如聞上一句之義次第受持讀誦書寫爲人廣說何以故聲聞辟支佛功德皆從此經出故因於此經能出一切菩薩及諸佛出現於世若讀誦此經次第句義分別解說即是受持一切佛法何以故此經即是一切經母若不得此經諸大勝法皆悉不得此經即是菩薩具戒一切諸聲聞弟子皆從座而起偏袒右肩合掌白佛言世尊我等於大生死聞是經故皆得出離佛言比丘如是如是爾時世尊普告大衆善男子善女

人若國土方域有是經典文字章句次第當知此處即是道場處即是轉法輪處即是諸佛大塔像處有此經處即是世尊何以故善男子法即是菩提法即是轉法輪善男子此法即是佛供養於法即是供養於佛若有說法法師處此處即是佛塔於此法師當生慇懃想善知識想作示正道想見是法師應生愛樂信敬歡喜應起遠迎請令就座應當讚歎善哉善哉快說法要若一劫若減一劫若過一劫讚歎如是猶不能盡何以故若人好樂法者種種讚歎尊重恭敬猶不能盡所行之處假使有人能以血灑地猶故不名盡心供養何以故如此法師則爲受持如來一切佛種如此法師應如師子無異不應作下劣想不作毀害心著淨潔衣深生信敬得他讚

歎而心不高亦不起我慢亦不輕他不為財

利專心說法爾時釋提桓因白佛言世尊若

有世界能說是經文字章句次第之處我當

躬自將諸眷屬往彼供養擁護法師佛言善

哉善哉僑尸迦是汝應作爾時除蓋障菩薩

身七

十三

摩訶薩白佛言世尊此次第所說當云何名

斯經善男子此經文字章句次第當名寶雲

亦名寶藏亦名智燈亦名除蓋障菩薩之所

受持爾時除蓋障菩薩及諸菩薩諸大聲聞

帝釋大梵護世天王摩醯首羅并諸天子而

為上首乃至天龍夜叉乾闥婆阿脩羅迦樓

羅緊那羅摩睺羅伽無量百千億眾皆稱善

哉善哉歡喜奉行

佛說寶雲經卷第七

音釋

庠序庠似羊切序象呂切炙之石切憎嫉憎作藤切嫉昨切

賢切曰嫉權昌切斛當口切貿莫侯切販願方切

切賈賤嫌隙嫌戶兼切疑也慘七感切獮也

徒貴者嫌隙隙移切逆切登也慘酷毒也獮也

于子也諮問也